

四庫全書薈要

• 乾隆御覽本

經部

欽定四庫全書薈要

經部
書經集傳卷五



詳校官祭酒臣韋謙恒

書經卷五

宋 蔡沈 集傳

召誥

左傳曰武王克商遷九鼎于洛邑史記載武王言我南望三途北望嶽鄙顧瞻有河



粵瞻洛伊母遠天室營周居于洛邑而後去則宅洛者武王之志周公成王成之召公實先經理之洛邑既成成王始政召公因周公之歸作書致告達之於王其書拳拳於歷年之久近反復乎夏商之廢興究其歸則以誠小民為祈天命之本以疾敬德為誠小民之本一篇之中屢致意焉古之大臣其為國家長遠慮盖如此以召公之書因以召誥名篇今文古文皆有

惟二月既望越六日乙未王朝步自周則至于豐

日月相望

謂之望既望十六日也乙未二十一日也周鎬京也去豐二十五里文王廟在焉成王至豐以宅洛之事告廟

也惟太保先周公相宅越若來三月惟丙午肫越三日

戊申太保朝至于洛卜宅厥既得卜則經營

肫敷尾反戊音茂○

成王在豐使召公先周公行相視洛邑越若來古語辭言召公於豐迤邐而來也肫孟康曰月出也三日明生之名戊申三月五日也卜宅者用龜卜宅都之地既得吉卜則經營規度其城郭宗廟郊社朝市之位越

三日庚戌太保乃以庶殷攻位于洛汭越五日甲寅位

成

庶殷殷之衆庶也用庶殷者意是時殷民已遷于洛故就役之也位成者左祖右社前朝後市之位成也

若翼日乙卯周公朝至于洛則達觀于新邑營

周公至則徧觀

新邑所經營之位

越三日丁巳用牲于郊牛二越翼日戊午乃

社于新邑牛一羊一豕一

郊祭天地也故用二牛社祭用太牢禮也皆告以營洛之

事越七日甲子周公乃朝用書命庶殷侯甸男邦伯

書

書也春秋傳曰士彌牟營成周計丈數揣高厚度厚薄勿溝洫物土方議遠邇量事期計徒庸慮材用書糒糧

以令役於諸侯亦此意王氏曰邦伯者侯甸男服之邦伯也庶邦冢君咸在而獨命邦伯者公以書命邦伯而

邦伯以公命諸侯也

厥既命殷庶庶殷丕作

丕作者言皆趨事赴功也殷之頑民

若未易役使者然召公率以攻位而位成周公用以書命而不丕作殷民之難化者猶且如此則其悅以使民可

也太保乃以庶邦冢君出取幣乃復入錫周公曰拜手

稽首旅王若公誥告庶殷越自乃御事

呂氏曰洛邑事畢周公將歸宗

周召公因陳戒成王乃取諸侯贄見幣物以與周公且言其拜手稽首所以陳王及公之意蓋召公雖與周公言乃欲周公聯諸侯之弊與召公之誥併達之王謂洛邑已定欲誥告殷民其根本乃自爾御事不敢指言成王謂之御事猶今稱人為執事也 嗚呼皇天上帝改厥元子茲大國殷

之命惟王受命無疆惟休亦無疆惟恤嗚呼曷其奈何

弗敬

此下皆告成王之辭託周公達之王也曷何也其語辭商受嗣天位為元子矣元子不可改而天改

之大國未易亡而天亡之皇天上帝其命之不可恃如此今王受命固有無窮之美然亦有無窮之憂於是歎息言王曷其奈何弗敬乎蓋深言不可以弗敬也又按此篇專主敬言敬則誠實無妄視聽言動一循乎理好

惡用捨不違乎天與天同德固能受天明命也人君保有天命其有要於此哉伊尹亦言皇天無親克敬惟親敬則天與我一矣尚何疎之有

天既遐終大邦殷之命茲殷多先哲王在天越厥後王後民茲服厥命厥終智藏瘝在夫知保抱攜持厥婦子以哀籲天徂厥亡出執嗚呼天亦哀于

四方民其眷命用懋王其疾敬德

後王後民指受也此章語多難解大意謂

天既欲遠絕大邦殷之命矣而此殷先哲王其精爽在天宜若可恃者而商紂受命卒致賢智者退藏病民者在位民困虐政保抱攜持其妻子哀號呼天往而逃亡出見拘執無地自容故天亦哀民而眷命用歸於勉德者天命不常如此今相古先民有夏天迪從子保而稽王其可不疾敬德乎

天若今時既墜厥命今相有殷天迪格保面稽天若今

時既墜厥命

從子保者從其子而保之謂禹傳之子也面鄉也視古先民有夏天固啓迪之又從

其子而保佑之禹亦面考天心敬順無違宜若可為後世憑藉者今時已墜厥命矣今視有殷天固啓迪之又使其格正夏命而保佑之湯亦面考天心敬順無違宜亦可為後世憑藉者今時已墜厥命矣以此知天命誠不可恃以今沖子嗣則無遺壽耆曰其稽我古人之德為安也

矧曰其有能稽謀自天

稽考矧況也幼沖之主於老成之臣尤易疎遠故召公言今王

以童子嗣位不可遺棄老成言其能稽古人之德是固不可遺也況言其能稽謀自天是尤不可遺也稽古人之德則於事有所證稽謀自天則於理無所遺無遺壽耆者蓋君天下者之要務故召公特首言之嗚呼

有王雖小元子哉其不能誠于小民今休王不敢後用

顧畏于民

召公歎息言王雖幼冲乃天之元子哉謂其年雖小其任則大也其者期之辭也誠

和暑險也王其大能誠和小民為今之休美乎小民雖至微而至為可畏王當不敢緩於敬德用顧畏于民之

暑險可也王來紹上帝自服于土中旦曰其作大邑其自時

配皇天祀祀于上下其自時中又王厥有成命治民今

休

洛邑天地之中故謂之土中王來洛邑繼天出治當自服行于土中是時洛邑告成成王始政故召公以

自服土中為言又舉周公嘗言作此大邑自是可以對越上天可以饗答神祇自是可以宅中國治成命者天之成命也成王而能紹上帝服土中則庶幾天有成命治民今即休美矣○王氏曰成王欲宅洛邑者以天事

言則日東景夕多風日西景朝多陰日南景短多暑日北景長多寒洛天地之中風雨之所會陰陽之所和也

以人事言則四方朝聘貢賦道里均焉故謂之土中

王先服殷御事比介于我有

周御事節性惟日其邁

言治人當先服乎臣也王先服殷之御事以親近副貳我周之

御事使其漸染陶成相觀為善以節其驕淫之性則日進於善而不已矣

王敬作所不可不

敬德

言化臣必謹乎身也所處所也猶所其無逸之所王能以敬為所則動靜語默出入起居無往而不

居敬矣不可不敬德者甚言德之不可不敬也

我不可不監于有夏亦不可不

監于有殷我不敢知曰有夏服天命惟有歷年我不敢

知曰不其延惟不敬厥德乃早墜厥命我不敢知曰有

殷受天命惟有歷年我不敢知曰不其延惟不敬厥德

乃早墜厥命

夏商歷年長短所不敢知我所知者惟不敬厥德即墜其命也與上章相古先民之

意相為出入但上章主言天眷之不足恃此則直言不敬德則墜厥命爾今王嗣受厥命我

亦惟茲二國命嗣若功王乃初服

今王繼受天命我謂亦惟此夏商之命當

嗣其有功者謂繼其能敬德而歷年者也況王乃新邑初政服行教化之始乎嗚呼若生子罔

不在厥初生自貽哲命今天其命哲命吉凶命歷年知

今我初服

歎息言王之初服若生子無不在於初生習為善則善矣自貽其哲命為政之道亦猶是

也今天其命王以哲乎命以吉凶乎命以歷年乎皆不可知所可知者今我初服如何爾初服而敬德則亦自

貽哲命而吉與歷年矣

宅新邑肆惟王其疾敬德王其德之用祈

天永命

宅新邑所謂初服也王其疾敬德容可緩乎王其德之用而祈天以歷年也

其惟王

勿以小民淫用非彝亦敢殄戮用乂民若有功

刑者德之反疾

於敬德則當緩於用刑勿以小民過用非法之故亦敢於殄戮用治之也惟順導民則可有功民猶水也水泛濫橫流失其性矣然壅而遏之則其惟王位在德元小害愈甚惟順而導之則可以成功

民乃惟刑用于天下越王顯

元首也居天下之上必有首天下之德王位在德元

則小民皆儀刑用德于下於王之德益以顯矣

上下勤恤其曰我受天命丕若

有夏歷年式勿替有殷歷年欲王以小民受天永命

其亦

期之辭也君臣勤勞期曰我受天命大如有夏歷年用
勿替有殷歷年欲兼夏殷歷年之永也召公又繼以欲
王以小民受天永命蓋以小民者勤恤之實受天永命
者歷年之實也蘇氏曰君臣一心以勤恤民庶幾王受
命歷年如夏商且拜手稽首曰予小臣敢以王之讎民
以民心為天命也

百君子越友民保受王威命明德王末有成命王亦顯

我非敢勤惟恭奉幣用供王能祈天永命

讎民殷之頑民與三監叛

者百君子殷之御事庶士也友民周之友順民也保者
保而不失受者受而無拒威命明德者德威德明也末
終也召公於篇終致敬言予小臣敢以殷周臣民保受
王威命明德王當終有天之成命以顯于後世我非敢
以此為勤惟恭奉幣帛用供王能祈天永命而已蓋奉
幣之禮臣職之所當恭而祈天之實則在王之所自盡

也又按恭奉幣意即上文取幣以錫周公而旅王者蓋當時成王將舉新邑之祀故召公奉以助祭云

洛誥

洛邑既定周公遣使告卜史氏錄之以為洛誥又并記其君臣答問及成王命周公

留治洛之事今文古文皆有○按周公拜手稽首以下周公授使者告卜之辭也王肇稱殷禮以下周公教成王宅洛之事也公明保予沖子以下成王命公留後治洛之事也王命予來以下周公許成王留洛君臣各盡其責難之辭也佅來以下成王錫命於殷命寧之事也戊辰以下史又記其祭祀冊誥等事及周公居洛歲月久近以附之以見周公作洛之始終而成王舉祀發政之後即歸于周而未嘗都洛也

周公拜手稽首曰朕復子明辟

此下周公授使者告卜之辭也拜手稽首者史

記周公遣使之禮也復如逆復之復成王命周公往營
成周周公得卜復命于王也謂成王為子者親之也謂
成王為明辟者尊之也周公相成王尊則君親則兄之
子也明辟者明君之謂先儒謂成王幼周公代王為辟
至是反政成王故曰復子明辟夫有失然後有復武王
崩成王立未嘗一日不居君位何復之有哉蔡仲之命
言周公位冢宰正百工則周公以冢宰總百工而已豈
不彰彰明甚矣乎王莽居攝幾傾漢鼎皆儒者有以啓
之是不可以不辨蘇氏曰此上有脫簡在康王如弗敢
誥自惟三月哉生魄至洪大誥治四十八字

及天基命定命予乃胤保大相東土其基作民明辟

凡有

造基之而後成成之而後定基命所以成始也定命所
以成終也言成王幼冲退託如不敢及知天之基命定
命予乃繼太保而往大相洛邑其庶幾為王始
作民明辟之地也洛邑在鎬京東故曰東土

予惟乙

卯朝至于洛師我卜河朔黎水我乃卜澗水東澹水西

惟洛食我又卜澹水東亦惟洛食俘來以圖及獻卜

澹音

虔俘補耕反○乙卯即召誥之乙卯也洛師猶言京師也河朔黎水河北黎水交流之內也澗水東澹水西王城也朝會之地澹水東下都也處商民之地王城在澗澹之間下都在澹水之外其地皆近洛水故兩云惟洛食也食者史先定墨而灼龜之兆正食其墨也王拜手俘使也圖洛之地圖也獻卜獻其卜之兆辭也

稽首曰公不敢不敬天之休來相宅其作周匹休公既

定宅俘來來視予卜休恒吉我二人共貞公其以予萬

億年敬天之休拜手稽首誨言

此王授使者復公之辭也王拜手稽首者成王

尊異周公而重其禮也匹配也公不敢不敬天之休命
來相宅為周匹休之地言卜洛以配周命於無窮也視
示也示我以卜之休美而常吉者也二人成王周公也
貞猶當也十萬曰億言周公宅洛規模宏遠以我萬億
年敬天休命故又拜手稽首謝周公告卜之誨言

周公曰王肇稱殷禮祀于新

邑咸秩無文

此下周公告成王宅洛之事也殷盛也與
五年再殷祭之殷同秩序也無文祀典不

載也言王始舉盛禮祀于洛邑皆序其所當祭者雖祀
典不載而義當祀者亦序而祭之也呂氏曰定都之初
肇舉盛禮大饗羣祀雖祀典不載者咸秩序而祭之有
告焉有報焉有祈焉始建新都昭假上下告成事也雨
暘時若大役以成報神賜也自今以始永奠中土祈鴻
休也後世不知祭祀之義鬼神之神之德觀周公首以祀于
新邑為言若闕於事情者抑不知人主臨鎮新都之始
齊被一心對越天地達此精明之德放諸四海無所不

準而助祭諸侯下逮胞翟之賤亦皆有孚顯若收其放而合其離蓋格君心萃天下之道莫要於此宜周公以

為首予齊百工倅從王于周予惟曰庶有事周公言予整齊百官

使從成王于周謂將適洛時也予惟謂之曰庶幾其有所事乎公但微示其意以待成王自教詔之也今

王即命曰記功宗以功作元祀惟命曰汝受命篤弼功宗功

功之尊顯者祭法曰聖王之制祭祀也法施於民則祀之以死勤事則祀之以勞定國則祀之能禦大災則祀

之能捍大患則祀之蓋功臣皆祭於大烝而勲勞之最尊顯者則為之冠故謂之元祀周公告成王即命曰記

功之尊顯者以功作元祀矣又惟命之曰汝功臣受此褒賞之命當益厚輔王室蓋作元祀既以慰答功臣而

又勉其左右王室不視功載乃汝其悉自教工示也功

載者記功之載籍也大視功載而無不公則百工效之亦皆公也大視功載而或出於私則百工效之亦皆私也其公其私悉自汝教之所謂乃汝其悉自教工孺子也上章告以褒賞功臣故戒其大視功載者如此孺子其朋孺子其朋其往無若火始燄燄厥攸灼叙弗其絕

孺子稚子也朋比也上文百工之視效如此則論功行賞孺子其可少徇比黨之私乎孺子其少徇比黨之私則自是而往有若火然始雖燄燄尚微而其灼爍將次第延藝不可待而撲滅矣言論功行賞徇私之害其初甚微其終至於不可遏絕所以嚴其辭而禁之於未然也厥若彛及撫事如予惟以

在周工往新邑倅嚮即有僚明作有功惇大成裕汝永

有辭

其順常道及撫國事常如我為政之時惟用見在周官勿參以私人往新邑使百工知上意嚮各就

有僚明白奮揚而赴功惇厚博大以裕
俗則王之休聞亦永有辭于後世矣

公曰已汝惟沖

子惟終

周之王業文武始之成王當終之也此上詳於記功教工內治之事此下則統御諸侯教養萬

民之汝其敬識百辟享亦識其有不享享多儀儀不及

物惟曰不享惟不役志于享凡民惟曰不享惟事其爽

侮

此御諸侯之道也百辟諸侯也享朝享也儀禮物幣也諸侯享上有誠有偽惟人君克敬者能識之識其

誠於享者亦識其不誠於享者享不在幣而在於禮幣

有餘而禮不足亦所謂不享也諸侯惟不用志于享則

國人化之亦皆謂上不必享矣舉國無享上之誠則政
事安得不至於差爽僭侮隳王度而為叛亂哉人君可
不以敬存心辨之乃惟孺子頒朕不暇聽朕教汝于棊
於早察之於微乎

民彛汝乃是不覆乃時惟不永哉篤叙乃正父罔不若

予不敢廢乃命汝往敬哉茲予其明農哉彼裕我民無

遠用戾

慶莫郎反○此教養萬民之道也頒朕不暇未詳或曰成王當頒布我汲汲不暇者聽我教汝

所以輔民常性之道汝於是而不勉焉則民彛泯亂而非所以長久之道矣正父武王也猶今稱先正云者篤

者篤厚而不忘叙者先後之不吝言篤叙武王之道無不如我則人不敢廢汝之命矣呂氏曰武王沒周公如

武王故天下不廢周公之命周公去成王如周公則天下不廢成王之命戾至也王往洛邑其敬之哉我其退

休田野惟明農事蓋公有歸老之志矣彼謂洛邑也王於洛邑和裕其民則民將無遠而至焉王若曰

公明保予沖子公稱丕顯德以予小子揚文武烈奉答

天命和恒四方民居師

此下成王答周公及留公也大抵與上章參錯相應明顯明之

也保保佑之也稱舉也和者使不乖也恒者使可久也居師者宅其衆也言周公明保成王舉大明德使其上

之不忝於文武仰不愧天俯不忤人也惇宗將禮稱秩元祀咸秩無文宗功

宗之宗也下文惟公德明光于上下勤施于四方旁作宗禮同將大也

穆穆迓衡不迷文武勤教予冲子夙夜毖祀

旁無方所也因上下

四方為言穆穆和敬也迓迎也言周公之德昭著於上下勤施於四方旁作穆穆以迎治平不迷失文武所勤

之教於天下公之德教加於時者如此予冲子夫何為哉惟早夜以謹祭祀而已蓋成王知周公有退休之志

故示其所以王曰公功棐迪篤罔不若時言周公之功所以輔我啓

我者厚矣當常如王曰公予小子其退即辟于周命公

是未可以言去也此下成王留周公治洛也成王言我退即居于周命公留後治洛蓋洛邑之作周公本欲成王遷都以宅

後天下之中而成王之意則未欲捨鎬京而廢祖宗之舊

故於洛邑舉祀發政之後即欲歸居于周而留周公治洛謂之後者先成王之辭猶後世留守留後之義先儒

謂封伯禽以為魯後者非是考之費誓東郊不開乃在周公東征之時則伯禽就國蓋已久矣下文惟告周公其後其字之義益可見其為周公不為伯禽也

方迪亂未定于宗禮亦未克教公功宗禮即功宗之禮也亂治也四方開

治公之功也未定功宗之禮故未能教公功迪將其後

也教功者安定其功之謂即下文命寧者也

監我士師工誕保文武受民亂為四輔將大也周公居洛啓大其後使

我士師工有所監視大保文武所受於天之民而治為
宗周之四輔也漢三輔蓋本諸此今按先言啓大其後
而繼以亂為四輔則命
王曰公定予往已公功肅將祇
周公留後於洛明矣

歡公無困哉我惟無斃其康事公勿替刑四方其世享

斃音亦○定爾雅曰止也成王欲周公止洛而自歸往
宗周言周公之功人皆肅而將之欽而悅之宜鎮撫洛
邑以慰懌人心毋求去以困我也我惟無厭其安民之
事公勿替所以監我士師工者四方得以世世享公之
德也吳氏曰前漢書兩引公無
周公拜手稽首曰王命
用哉皆以哉作我當以我為正

予來承保乃文祖受命民越乃先烈考武王弘朕恭此

周公許成王留洛事也來者來洛邑也承保乃文祖受
命民及先烈考武王者答誕保文武受民之言也責難

於君謂之恭弘朕恭孺子來相宅其大惇典殷獻民亂者大其責難之義也

為四方新辟作周恭先曰其自時中又萬邦咸休惟王

有成績

典典章也殷獻民殷之賢者也言當大厚其典章及殷之獻民蓋文獻者為治之大要也亂治

也言成王於新邑致治為四方新主也作周恭先者人君恭以接下以恭而倡後王也公又言其自是宅中圖治萬邦咸底休美則王其有成績矣予旦以多子越御此周公以治洛之效望之成王也

事篤前人成烈答其師作周孚先考朕昭子刑乃單文

祖德

多子者衆卿大夫也唐孔氏曰子者有德之稱大夫皆稱子師衆也周公言我以衆卿大夫及治事

之臣篤厚文武成功以答天下之衆也孚信也作周孚先者人臣信以事上以信而倡後人也考成也昭子猶

所謂明辟也親之故曰子刑儀刑也單殫也言成我明
子儀刑而殫盡文王之德蓋周公與羣臣篤前人成烈
者所以成成王之刑乃殫文祖德
也此周公以治洛之事自效也
倅來毖殷乃命寧子

絕句以秬鬯二卣曰明禋拜手稽首休享

秬白許反鬯丑亮反卣音由禋

音因○此謹誌殷民而命寧周公也秬黑黍也一稊二
米和氣所生鬯鬱金香草也卣中尊也明潔禋敬也以
事神之禮事公也蘇氏曰以黑黍為酒合以鬱鬯所以
裸也宗廟之禮莫盛於裸王使人來戒敕庶殷且以秬
鬯二卣綏寧周公曰明禋曰休享者何也事周公如事
神明也古者有大賓客以享禮禮之酒清人渴而不飲
肉乾人饑而不食也故享有體薦予不敢宿則禋于文
豈非敬之至者則其禮如祭也歟
王武王宿與顧命三宿之宿同禋祭名周惠篤敘無有

邁自疾萬年厭于乃德殷乃引考

○邁居候反厭於艷反此祭之祝辭周公

為成王禱也惠順也篤叙與篤叙乃正父同順篤敘文武之道身其康強無有邁遇自罹疾害者子孫萬年厭

飽乃德殷人亦永壽考也王侔殷乃承敘萬年其永觀朕子懷德承

受也敘教條次第也王使殷人承敘萬年其永觀法我孺子而懷其德也蓋周公雖許成王留洛然且謂王侔

殷者若曰遷洛之民我固任之至於使其承敘萬年則實繫于王也亦責難之意與召誥末用供王能祈天永

命語脉相類戊辰王在新邑烝祭歲文王騂牛一武王騂牛

一王命作冊逸祝冊惟告周公其後王賓殺禋咸格王

入太室裸戊音茂裸古玩反○此下史官記祭祀冊誥等事以附篇末也戊辰十二月之戊辰日也

是日成王在洛舉烝祭之禮曰歲云者歲舉之祭也周尚赤故用騂宗廟禮太牢此用特牛者命周公留後於洛故舉盛禮也逸史佚也作冊者冊書也逸祝冊者史逸為祝冊以告神也惟告周公其後者祝冊所載更不他及惟告周公留守其後之意重其事也王賓猶虞賓祀宋之屬助祭諸侯也諸侯以王殺牲禋祭祖廟故咸至也太室清廟中央室也裸灌也王命周公後作冊逸以圭瓚酌秬鬯灌地以降神也

誥在十有二月

逸誥者史逸誥周公治洛留後也在惟十有二月者明戊辰為十二月日也

周公誕保文武受命惟七年

吳氏曰周公自留洛之後凡七年而薨也成王之留

公也言誕保文武受民公之復成王也亦言承保乃文祖受命民越乃光烈考武王故史臣於其終計其年曰惟周公誕保文武受命惟七年蓋始終公之辭云

多士

商民遷洛者亦有有位之士故周公洛邑初政以王命總呼多士而告之編書者因

以名篇亦誥體也今文古文皆有○吳氏曰方遷商民于洛之時成周未作其後王與周公患

四方之遠鑒三監之叛於是始作洛邑欲徙周而居之其曰昔朕來自奄大降爾四國民命我

乃明致天罰移爾遐逝比事臣我宗多遜者述遷民之初也曰今朕作大邑于茲洛予惟四方

罔攸賓亦惟爾多士攸服奔走臣我多遜者言遷民而後作洛也故洛誥一篇終始皆無欲遷

商民之意惟周公既誥成王留治于洛之後乃曰俘來愍殷又曰王俘殷乃承敘當時商民已

遷于洛故其言如此愚謂武王已有都洛之志故周公黜殷之後以殷民反覆難制即遷于洛

至是建成周造廬舍定疆場乃告命與之更始馬爾此多士之所以作也由是而推則召誥攻

位之庶殷其已遷洛之民歟不然則受都今衛
州也洛邑今西京也相去四百餘里召公安得
舍近之友民而役遠之讎民哉書序以為成周
既成遷殷頑民者謬矣吾固以為非孔子所作
也

惟三月周公初于新邑洛用告商王士

此多士之本序也三月成王祀

洛次年之三月也周公至洛久矣此言初者成王既不
果遷留公治洛至是公始行治洛之事故謂之初也曰
商王士者王若曰爾殷遺多士弗弔昊天大降喪于殷

貴之也

我有周佑命將天明威致王罰勅殷命終于帝

弗弔未詳意其

為歎憫之辭當時方言爾也是天秋天也王肅殺而言
歎憫言是天大降災害而喪殷我周受眷佑之命奉將

天之明威致王罰之公勅正殷命而革之以
終上帝之事蓋推革命之公以開諭之也
肆爾多士

非我小國敢弋殷命惟天不畀允罔固亂弼我其敢

求位

肆與康誥肆汝小子封同弋取也弋鳥之弋言有心於取之也呼多士誥之謂以勢而言我小國亦

豈敢弋取殷命蓋裁者培之傾者覆之固其治而不固其亂者天之道也惟天不與殷信其不固殷之亂矣惟天不固殷之亂故輔我周之治而天位自有所不容辭者我其敢有求位之心哉惟帝不畀惟

我下民秉為惟天明畏

秉持也言天命之所不與即民心之所秉為民心之所秉為即

天威之所明畏者也反覆天民相因之理以見天之果不外乎民之果不外乎天也詩言秉彜此言秉為者彜以理言為我聞曰上帝引逸有夏不適逸則惟帝降

格嚮于時夏弗克庸帝大淫泆有辭惟時天罔念聞厥

惟廢元命降致罰

引導逸安也降格與呂刑降格同呂氏曰上帝引逸者非有形聲之接也

人心得其安則疊疊而不能已斯則上帝引之也是理坦然亦何間于桀第桀喪其良心自不適於安耳帝實引之桀實避之帝猶未遽絕也乃降格災異以示意嚮於桀桀猶不知警懼不能敬用帝命乃大肆淫泆雖有矯誣之辭而天罔念聞之仲虺所謂帝用不乃命爾先臧是也廢其大命降致其罰而夏祚終矣

祖成湯革夏俊民甸四方

甸治也伊尹稱湯旁求俊彥孟子稱湯立賢無方蓋明揚

俊民分布遠邇甸治區畫成湯立政之大經也周公反復以夏商為言者蓋夏之亡即殷之亡湯之興即武王

之興也商民觀是亦可以自反矣

自成湯至于帝乙罔不明德恤祀

明德

者所以修其身恤祀者所以敬乎神也

亦惟天丕建保乂有殷殷王亦罔

敢失帝罔不配天其澤

亦惟天大建立保治有殷殷之先王亦皆操存此心無敢失帝

之則無不配天以澤民也

在今後嗣王誕罔顯于天矧曰其有聽念

于先王勤家誕淫厥汰罔顧于天顯民祗

後嗣王紂也紂大不明於

天道況曰能聽念商先王之勤勞於邦家者乎大肆淫汰無復顧念天之顯道民之敬畏者也

惟時上

帝不保降若茲大喪

大喪者國亡而身戮也

惟天不畀不明厥德

商先王以明德而天丕建則凡四方小大邦喪罔非有商後王不明德而天不畀矣

凡四方小大邦喪罔非有

辭于罰

凡四方小大邦國喪亡其致罰皆有可言者况商罪貫盈而周奉辭以罰之者乎

王若

曰爾殷多士今惟我周王丕靈承帝事

靈善也大善承天之所為也武

成言祇承上帝以遏亂略是也

有命曰割殷告勅于帝

帝有命曰割殷則不得不戡定

翦除告其勅正之事于帝也武成言告于皇天后土將有大正于商者是也

惟我事不貳適

惟爾王家我適

上帝臨汝母貳爾心惟我事不貳適之謂上帝既命侯于周服惟爾王家我適

之謂言割殷之事非有私心一於從帝而無貳適則爾殷王家自不容不我適矣周不貳於帝殷其能貳於周乎蓋示以確然不可動搖之意而潛消頑民反側之情爾然聖賢事不貳適日用飲食莫不皆然蓋所以事天也

豈特割殷之事而已哉

予其曰惟爾洪無度我不爾動自乃邑

三監

倡亂予其曰乃汝大為非法非我爾動變自爾邑猶伊訓所謂造攻自鳴條也

予亦急天即于

殷大戾肆不正

予亦念天就殷邦屢降大戾紂既死武庚又死故邪惡不正言當遷徙也

王

曰猷告爾多士予惟時其遷居西爾非我一人奉德不

康寧時惟天命無違朕不敢有後無我怨

時是也指上文殷大戾而

言謂惟是之故所以遷居西爾非我一人樂如是之遷徙震動也是惟天命如此汝毋違越我不敢有後命謂

有他罰爾惟爾知惟殷先人有冊有典殷革夏命

即其舊聞

以開諭之也殷之先世有冊書典籍載殷改夏命之事正如是耳爾何獨疑於今乎

今爾又曰夏

迪簡在王庭有服在百僚予一人惟聽用德肆予敢求

爾于天邑商予惟率肆矜爾非予罪時惟天命

周公既舉商革

夏事以諭頑民頑民復以商革夏事責周謂商革夏命之初凡夏之士皆啓迪簡拔在商王之庭有服列于百僚之間今周於商士未聞有所簡拔也周公舉其言以大義折之言爾頑民雖有是言然予一人所聽用者惟以德而已故予敢求爾於天邑商而遷之於洛者以冀率德改行焉予惟循商故事矜恤於爾而已其不爾用者非我之罪也是惟天命如此蓋章德者天之命今頑民滅德而欲求用得乎

王曰多士昔朕

來自奄予大降爾四國民命我乃明致天罰移爾遐遜

比事臣我宗多遜

降猶今法降等云者言昔我來自商奄之時汝四國之民罪皆應死我大

降爾命不忍誅戮乃止明致天罰移爾遠居于洛以親比臣我宗周有多遜之美其罰益亦甚輕其恩固已甚厚今乃猶有所怨望乎詳此

王曰告爾殷多士今予惟

章則商民之遷固已久矣

不爾殺予惟時命有申今朕作大邑于茲洛予惟四方

罔攸賓亦惟爾多士攸服奔走臣我多遜

以自奄之命為初命則此

命為申命也言我惟不忍爾殺故申明此命且我所以營洛者以四方諸侯無所賓禮之地亦惟爾等服事奔走臣我多遜而無所處故也詳此章則遷民在營洛之先矣吳氏曰來自奄稱昔者遠日之辭也作大邑稱今者近日之辭也移爾遐邇比臣事我宗多遜者期之之辭也攸服奔走臣我多遜者果能之辭也以此又知遷民在前而作爾乃尚有爾土爾乃尚寧幹止

幹事止居洛在後也爾乃庶

幾有爾田業庶幾安爾所事安爾所居也詳此章所言皆仍舊有土田居止之辭信商民之遷舊矣孔氏不得其說而以得反所生釋之爾克敬天惟畀矜爾爾不克於文義似矣而事則非也

敬爾不啻不有爾土予亦致天之罰于爾躬

敬則言動無不循理

天之所福吉祥所集也不敬則言動莫不違悖天之所禍刑戮所加也豈特竄徙不有爾土而已哉身亦有所

不能保矣今爾惟時宅爾邑繼爾居爾厥有幹有年于茲洛

爾小子乃興從爾遷

邑四井為邑之邑繼者承續安居之謂有營為有壽考皆于茲洛焉

爾之子孫乃興自爾遷始也夫自亡國之末裔為起家之始祖頑民雖愚亦知所擇矣

王曰又曰

時予乃或言爾攸居

王曰之下當有闕文以多方篇末王曰又曰推之可見時我或有所

言皆以爾之所居止為念也申結上文爾居之意

無逸

逸者人君之大戒自古有國家者未有不以勤而興以逸而廢也益戒舜曰罔遊于

逸罔淫于樂舜大聖也益猶以是戒之則時君
世主其可忽哉成王初政周公懼其知逸而不
知無逸也故作是書以訓之言則古昔必稱商
王者時之近也必稱先王者王之親也舉三宗
者繼世之君也詳文祖者耳目之所逮也上自
天命精微下至畎畝艱難閭里怨詛無不具載
豈獨成王之所當知哉實天下萬世人主之龜
鑑也是篇凡七更端周公皆以嗚呼發之深嗟
永歎其意深遠矣亦訓
體也今文古文皆有

周公曰嗚呼君子所其無逸

所猶處所也君子以無逸為所動靜食息無不在是

馬作輟則非所謂所矣

先知稼穡之艱難乃逸則知小人之依

知先

稼穡之艱難乃逸者以勤居逸也依者指稼穡而言小
民所恃以為生者也農之依田猶魚之依水木之依土

魚無水則死木無土則枯民非稼穡則無以生也故舜
自耕稼以至為帝禹稷躬稼以有天下文武之基起於
后稷四民之事莫勞於稼穡生民之功莫盛於相小人
稼穡周公發無逸之訓而首及乎此有以哉

厥父母勤勞稼穡厥子乃不知稼穡之艱難乃逸乃諂

既誕否則侮厥父母曰昔之人無聞知

諂疑戰反○不知稼穡之艱難

乃逸者以逸為逸也俚語曰諂言視小民其父母勤勞
稼穡其子乃生於養養不知稼穡之艱難乃縱逸自恣
乃習俚巷鄙語既又誕妄無所不至不然則又訛侮其
父母曰古老之人無聞無知徒自勞苦而不知所以自
逸也昔劉裕奮農畝而取江左一再傳後子孫見其服
用反笑曰田舍翁得此亦過矣此正所謂昔之人無聞
知也使成王非周公之訓安知周公曰嗚呼我聞曰昔
其不以公劉后稷為田舍翁也

在殷王中宗嚴恭寅畏天命自度治民祇懼不敢荒寧

肆中宗之享國七十有五年

中宗太戊也嚴則莊重恭則謙抑寅則欽肅畏則戒

懼天命即天理也中宗嚴恭寅畏以天理而自檢律其身至於治民之際亦祇敬恐懼而不敢怠荒安寧中宗

無逸之實如此故能有享國永年之效也按書序太戊有原命成乂等篇意述其當時敬天治民之事今無所

考矣其在高宗時舊勞于外爰暨小人作其即位乃或亮

陰三年不言其惟不言言乃雍不敢荒寧嘉靖殷邦至

于小大無時或怨肆高宗之享國五十有九年

亮音梁陰音菴

○高宗武丁也未即位之時其父小乙使久居民間與小民出入同事故於小民稼穡艱難備嘗知之也雍和

也發言和順當於理也嘉靖安也嘉靖者禮樂教化蔚然於安居樂業之中也漢文帝與民休息謂之靖則可謂之嘉則不可小大無時或怨者萬民咸和也乃雍者和之發於身嘉靖者和之達於政無怨者和之著於民也餘見說命高宗無逸之實其在此祖甲不義惟王舊如此故亦有享國永年之效也

為小人作其即位爰知小人之依能保惠于庶民不敢

侮鰥寡肆祖甲之享國三十有三年

史記高宗崩子祖庚立祖庚崩弟祖

甲立則祖甲高宗之子祖庚之弟也鄭玄曰高宗欲廢祖庚立祖甲祖甲以為不義逃於民間故云不義惟王

○按漢孔氏以祖甲為太甲蓋以國語稱帝甲亂之七世而殞孔氏見此等記載意為帝甲必非周公所稱者又以不義惟王與太甲茲乃不義文似遂以此稱祖甲者為太甲然詳此章舊為小人作其即位與上章爰暨

小人作其即位文勢正類所謂小人者皆指微賤而言
非謂儉小之人也作其即位亦不見太甲復政思庸之
意又按邵子經世書高宗五十九年祖庚七年祖甲三
十三年世次歷年皆與書合亦不以太甲為祖甲況殷
世二十有九以甲名者五帝以太以小沃以陽以祖
別之不應二人俱稱祖甲國語傳訛承謬旁記曲說不
足盡信要以周公之言為正又下文周公言自殷王中
宗及高宗及祖甲及我周文王及云者因其先後次第
而枚舉之辭也則祖甲之為祖甲而非太甲明矣

自時厥後立王生則逸生則

逸不知稼穡之艱難不聞小人之勞惟耽樂之從自時

厥後亦罔或克壽或十年或七八年或五六年或四三

年

過樂謂之耽泛言自三宗之後即君位者生則逸豫
不知稼穡之艱難不聞小人之勞惟耽樂之從伐性

喪生故自三宗之後亦無能壽考遠者不過十年七八年近者五六年三四年爾耽樂愈甚則享年愈促也凡人莫不欲壽而惡夭此篇專以享年永永不周公曰嗚呼永為言所以開其所欲而禁其所當戒也

厥亦惟我周太王王季克自抑畏

商猶異世也故又即我周先王告之言太

王王季能自謙抑謹畏者蓋將論文王之無逸故先述其源流之淡長也大抵抑畏者無逸之本縱肆怠荒皆

矜誇無忌憚者之為故下文言文王曰柔曰恭曰不敢皆原太王王季抑畏之心發之耳

文王卑服

即康功田功

卑服猶禹所謂惡衣服也康功安民之功田功養民之功言文王於衣服之奉所性

不存而專意於安養斯民也卑服蓋舉一端而言宮室飲食自奉之薄皆可類推

徽柔懿恭懷

保小民惠鮮鰥寡自朝至于日中昃不遑暇食用咸和

萬民

徵懿皆美也。是日眊也。柔謂之徵則非柔懦之柔。恭謂之懿則非足恭之恭。文王有柔恭之德而極。

其徵懿之盛和易近民於小民則懷保之於鰥寡則惠鮮之惠鮮云者鰥寡之人垂首喪氣賚予賙給之使之

有生意也。自朝至于日之中自中至于日之昃一食之頃有不遑暇欲咸和萬民使無一不得其所也。文王心

在乎民自不知其勤勞如此。豈秦始皇衛石程書隋文帝衛士傳餐代有司之任者之為哉。立政言罔攸兼于

庶言庶獄庶慎則文王又若無所事事者不讀無逸則無以知文王之勤不讀立政則無以知文王之逸合二

書觀之則文王之文王不敢盤于遊田以庶邦惟正之

供文王受命惟中身厥享國五十年

遊田國有常制文王不敢盤遊無度

上不濫費故下無過取而能以庶邦惟正之供於常貢正數之外無橫斂也。言庶邦則民可知。文王為西伯所

統庶邦皆有常供春秋貢於霸主者班班可見至唐猶有送使之制則諸侯之供方伯舊矣受命言為諸侯也中身者漢孔氏曰文王九十七而終即位時年四十七言中身舉全數也上文崇素儉恤孤獨勤政事戒遊佚皆文王無逸之實故周公曰嗚呼繼自今嗣王則其無其享國有歷年之永

淫于觀于逸于遊于田以萬民惟正之供

則法也其指文王而言淫

過也言自今日以往嗣王其法文王無過于觀逸遊田以萬民惟正賦之供上文言遊田而不言觀逸以大而包小也言庶邦而不言萬民以遠而見近也無皇曰今日耽樂乃非民攸訓

非天攸若時人不則有愆無若殷王受之迷亂酗于酒

德哉

無與母通皇與違通訓法若順則法也母自寬假曰今日姑為是耽樂也一日耽樂固若未害然下

非民之所法上非天之所順時人大法其過逸之行猶商人化受而崇飲之類故繼之曰毋若商王受之沈迷

酖于酒德哉酖酒謂之德者德有凶

有吉韓子所謂道與德為虛位是也

周公曰嗚呼我聞

曰古之人猶胥訓告胥保惠胥教誨民無或胥壽張

為幻

請張流反幻音患○胥相訓誠惠順請誑張誕也變名易實以眩觀者曰幻歎息言古人德業已盛

其臣猶且相與誠告之相與保惠之相與教誨之保惠者保養而將順之非特誠告而已也教誨則有規正成就之意又非特保惠而已也惟其若是是以視聽思慮無所蔽塞好惡取予明而不悖故當時之民無或敢誑誕為此厥不聽人乃訓之乃變亂先王之正刑至于

小大民否則厥心違怨否則厥口詛祝

否俯久反詛莊助反祝音呪○

正刑正法也言成王於上文古人胥訓告保惠教誨之事而不聽信則人乃法則之君臣上下師師非度必變亂先王之正法無小無大莫不盡取而紛更之蓋先王之法甚便於民甚不便於縱侈之君如省刑罰以重民命民之所便也而君之殘酷者則必變亂之如薄賦斂以厚民生民之所便也而君之貪侈者則必變亂之厥心違怨者怨之蓄于中也厥口詛祝者怨之形于外也為人上而使民心口交怨其國不危者未之有也此蓋治亂存亡之機故

周公曰嗚呼自殷王中宗及高宗及

祖甲及我周文王茲四人迪哲

迪蹈哲智也孟子以知而弗去為智之實迪云

者所謂弗去是也人主知小人之依而或忿戾之者是不能蹈其知者也惟中宗高宗祖甲文王允蹈其知故

周公以迪

厥或告之曰小人怨汝詈汝則皇自敬德厥

愆曰朕之愆允若時不啻不敢含怒

言力智反○詈罵言也其或有告之

曰小人怨汝詈汝則皇自敬德反諸其身不尤其人其所誣毀之愆安而受之曰是我之愆允若時者誠實若是非止隱忍不敢藏怒也蓋三宗文王於小民之依心誠知之故不暇責小人之過言且因以察吾身之未至怨詈之語乃所樂聞是豈特此厥不聽人乃或譟張止於隱忍含怒不發而已哉

為幻曰小人怨汝詈汝則信之則若時不永念厥辟不

寬綽厥心亂罰無罪殺無辜怨有同是叢于厥身

綽尺約反

○綽大叢聚也言成王於上文三宗文王迪哲之事不肯聽信則小人乃或誣誕變置虛實曰小民怨汝詈汝汝則聽信之則如是不能永念其為君之道不能寬大其心以誣誕無實之言羅織疑似亂罰無罪殺戮無辜

天下之人受禍不同而同於怨皆叢於人君之一身亦何便於此哉大抵無逸之書以知小人之依為一篇綱領而此章則申言既知小人之依則當蹈其知也三宗文王能蹈其知故其習次寬平人之怨詈不足以芥蒂其心如天地之於萬物一於長育而已其悍疾憤戾夫豈私怒於其間哉天地以萬物為心人君以萬民為心故君人者要當以民之怨詈為己責不當以民之怨詈為己怒以為己責則民安而君亦安以為己怒則民危而君亦危矣

周公曰嗚呼嗣王其監于茲茲者指上文而言也無逸

一篇七章章首皆先致其咨嗟詠歎之意然後及其所言之事至此章則於嗟歎之外更無他語惟以嗣王其監於茲結之所謂言有盡而意則無窮成王得無深警於此哉

君奭

召公告老而去周公留之史氏錄其告語為篇亦誥體也以周公首呼君奭因以君

奭名篇篇中語多未詳今文古文皆有○按此篇之作史記謂召公疑周公當國踐祚唐孔氏謂召公以周公嘗攝王政今復在臣位葛氏謂召公未免常人之情以爵位先後介意故周公作是篇以諭之陋哉斯言要皆為序文所誤獨蘇氏謂召公之意欲周公告老而歸為近之然詳本篇旨意廼召公自以盛滿難居欲避權位退老厥邑周公反覆告諭以留之爾整復而詳味之其義固可見也

周公若曰君奭

君者尊之之稱奭召公名也古人尚質相與語多名之

弗弔天降

喪于殷殷既墜厥命我有周既受我不敢知曰厥基永

孚于休若天棐忱我亦不敢知曰其終出于不祥

不祥者休

之反也天既下喪亡于殷殷既失天命我有周既受之矣我不敢知曰其基業長信於休美乎如天果輔我之誠耶我亦不敢知曰其終果出於不祥乎○按此篇周公留召公而作此其言天命吉凶雖曰我不敢知然其懽惻危懼之意天命吉凶之決
嗚呼君已曰時我我亦實主於召公留不留如何也

不敢寧于上帝命弗永遠念天威越我民罔尤違惟人在我後嗣子孫大弗克恭上下遏佚前人光在家不知

尤怨違背也周公歎息言召公已嘗曰是在我而已周公謂我亦不敢苟安天命而不永遠念天之威於我民無尤怨背違之時也天命民心去就無常實惟在人而已今召公乃忘前日之言翻然求去使在我後嗣子孫大不能敬天敬民驕慢肆侈過絕佚
天命不易天難諶墜文武光顯可得謂在家而不知乎

乃其墜命弗克經歷嗣前人恭明德

謹時壬反○天命不易猶詩曰命不

易哉命不易保天難謹信乃其墜失天命者以不能經歷繼嗣前人之恭明德也吳氏曰弗克恭故不能嗣前

人之恭德過佚前人光故不能嗣前人之明德

在今予小子旦非克有正迪惟

前人光施于我沖子

吳氏曰小子自謙之辭也非克有正亦自謙之辭也言在今我小子

旦非能有所正也凡所開導惟以前人光大之德使益焜耀而付于沖子而已以前言後嗣子孫過佚前人光

而言也

又曰天不可信我道惟寧王德延天不庸釋于文

王受命

又曰者以上文言天命不易天難謹此又申言天不可信故曰又曰天固不可信然在我之道

惟以延長武王之德使天不容捨文王所受之命也

公曰君奭我聞在昔成湯既

受命時則有若伊尹格于皇天在太甲時則有若保衡

在太戊時則有若伊陟臣扈格于上帝巫咸又王家在

祖乙時則有若巫賢在武丁時則有若甘盤

時則有若者言當其

時有如此人也保衡即伊尹也見說命大戊太甲之孫伊陟伊尹之子臣扈與湯時臣扈二人而同名者也巫氏咸名祖乙大戊之孫巫賢巫咸之子也武丁高宗也甘盤見說命呂氏曰此章序商六臣之烈蓋勉召公匹休於前人也伊尹佐湯以聖輔聖其治化與天無間伊陟臣扈之佐大戊以賢輔賢其治化克厭天心自其徧覆言之謂之天自其主宰言之謂之帝書或稱天或稱帝各隨所指非有重輕至此章對言之則聖賢之分而深淺見矣巫賢止言其又王家者咸之為治功在王室精微之蘊猶有愧於二臣也亡書有咸又四篇其又王

家之實歟。巫賢甘盤而無指言者，意必又次於巫咸也。
○蘇氏曰：殷有聖賢之君七，此獨言五。下文云：殷禮陟配，天豈配祀于天者止此五王，而其臣偕配食于廟乎？在武丁時，不言傳說，豈傳說不配食于配天之王乎？其詳不得而聞矣。率惟茲有陳保，又有殷故殷禮陟配天，多歷年所。
陟，升遐也。言六臣循惟此道，有陳列之功，以保天。又有殷故，殷先王終以德配天而享國長久也。天惟

純佑命，則商實百姓。王人罔不秉德明恤，小臣屏侯甸矧咸奔走，惟茲惟德，稱用乂厥辟。故一人有事于四方，

若卜筮罔不是孚。

佑，助也。實，虛實之實。國有人，則實。孟子言不信仁賢，則國空虛是也。稱舉

也。亦秉持之義。事征伐會同之類。承上章六臣輔君格天致治，遂言天佑命有商純一而不雜，故商國有人而

實內之百官著姓與夫王臣之微者無不秉持其德明致其憂外之小臣與夫藩屏侯甸矧皆奔走服役惟此之故惟德是舉用又其君故君有事于四方如龜之卜如著之筮天下無不敬信之也

公曰君奭

天壽平格保乂有殷有殷嗣天滅威今汝永念則有固命厥亂明我新造邦

呂氏曰坦然無私之謂平格者通徹三極而無間者也天無私壽惟

至平通格于天者則壽之伊尹而下六臣能盡平格之實故能保乂有殷多歷年所至于殷紂亦嗣天位乃驟罹滅亡之威天曾不私壽之也固命者不墜之天命也今召公勉為周家久永之念則有天之固命其治效亦赫然明著於我新造之邦而身與國俱顯矣公曰君奭在昔上帝割申勸寧

王之德其集大命于厥躬

申重勸勉也在昔上帝降割于殷申勸武王之德而集大

命于其身使
有天下也

惟文王尚克修和我有夏亦惟有若虢叔

有若閔夭有若散宜生有若泰顛有若南宮括

虢叔文王弟閔

散泰南宮皆氏天宜生顛括皆名言文王庶幾能修治變和我所有諸夏者亦惟有虢叔等五臣為之輔也康

誥言一二邦以修無逸言用咸和萬民即文王修和之實也

又曰無能往來茲迪彝

教文王蔑德降于國人

蔑莫結反○蔑無也夏氏曰周公前既言文王之興本此五臣

故又反前意而言曰若此五臣者不能為文王往來奔走於此導迪其常教則文王亦無德降及於國人矣周

公反覆以明其意故以人曰更端發之

亦惟純佑秉德迪知天威乃惟時

昭文王迪見冒聞于上帝惟時受有殷命哉

言文王有此五臣者

故亦如殷為天純佑命百姓王人罔不秉德也上既反言文王若無此五臣為迪彝教則亦無德下及國人故此又正言亦惟天乃純佑文王蓋以如是秉德之臣蹈履至到實知天威以是昭明文王啓迪其德使著見於上履冒於下而升聞于上帝惟武王惟茲四人尚迪有是之故遂能受有殷之天命也

祿後暨武王誕將天威咸劉厥敵惟茲四人昭武王惟

冒不單稱德

單與殫通稱平聲○號叔先死故曰四人劉殺也單盡也武王惟此四人庶幾迪有

天祿其後暨武王盡殺其敵惟此四人能昭武王遂覆冒天下天下大盡稱武王之德謂其達聲教於四海也
文王冒西土而已不單稱德惟武王為然於文王言命於武王言祿者文王但受天命至武王方富有天下也
呂氏曰師尚父之事文武烈莫盛焉不與五臣之列蓋一吐說論或詳或畧隨意而言主於留名公而非欲為

人物評也

今在予小子旦若游大川予往暨汝奭其濟小子

同未在位誕無我責收罔勛不及考造德不降我則鳴

鳥不聞矧曰其有能格

小子旦自謙之辭也浮水曰游周公言承文武之業懼不克濟

若浮大川罔知津涯豈能獨濟哉予往與汝召公共濟可也小子成王也成王幼冲雖已即位與未即位同

誕大也大無我責上疑有缺文收罔勛不及未詳考造德不降言召公去則考老成人之德不下於民在郊之

鳳將不復得聞其鳴矣况敢言進此而有感格乎是時周方隆盛鳴鳳在郊卷阿鳴于高岡者乃詠其實故周

公云爾也公曰嗚呼君肆其監于茲我受命無疆惟休亦大

惟艱告君乃猷裕我不以後人迷

肆大猷謀也茲指上文所言周公歎息欲

召公大監視上文所陳也我文武受命固有無疆之美矣然迹其積累締造蓋亦艱難之大者不可不相與竭力保守之也告君謀所以寬裕之道勿狹隘求去我不欲後人迷惑而失道也○呂氏曰大臣之位百責所萃震撼擊撞欲其鎮定辛甘燥濕欲其調齊盤錯禁結欲其解紆黜閹汚濁欲其茹納自非曠度洪量與夫患失乾沒者未嘗無翩然捨去之意况召公親遭大變破斧缺戕之時屈折調護心勞力瘁又非平時大臣之比顧以成王未親政不敢乞身爾一旦政柄有歸浩然去志固人情之所必至然思文武王業之艱難念成王守成之無助則召公義未可去也今乃汲汲然求去之不暇其迫切已甚矣蓋謀所以寬裕之道圖功攸終展布四體為久大規模使君德開明未可捨去而聽後人之迷惑也

公曰前人敷乃心乃悉

命汝作汝民極曰汝明勗偶王在亶乘茲大命惟文王

德丕承無疆之恤

偶配也蘇氏曰周公與召公同受武王顧命輔成王故周公言前人敷乃

心腹以命汝召公位三公以為民極且曰汝當明勉輔

孺子如耕之有偶也在於相信如車之有馭也并力一

心以載天命念文考之舊德以丕承無公曰君告汝朕

疆之憂武王之言如此而可以去乎允保奭其汝克敬以予監于殷喪大否肆念我天威

大亂也告汝以我之誠呼其官而名之言汝能敬以我予不允惟若茲誥予惟曰襄我二人汝有合哉言曰在

所言監視殷之喪亡大亂可不大念我天威之可畏乎時二人天休滋至惟時二人弗戡其汝克敬德明我俊

民在讓後人于丕時戡勝也戡堪古通用周公言我不

業之成在我與汝而已汝聞我言而有合哉亦曰在是
二人但天休滋至惟是我二人將不堪勝汝若以盈滿
為懼則當能自敬德益加寅畏明揚俊民布列庶位以
盡大臣之職業以答滋至之天休毋徒惴惴而欲去為
也他日在汝推避後人于盛大之時起嗚呼篤棐時二
然肥遯誰復汝禁今豈汝辭位之時乎

人我式克至于今日休我咸成文王功于不怠不冒海

隅出日罔不率俾

周公復歎息言篤於輔君者是我二
人我用能至于今日休盛然我欲與

召公共成文王功業于不怠大履冒斯民使海隅日出
之地無不臣服然後可也周都西土去東為遠故以日
出言吳氏曰周公未嘗有其功以其留召公故言之公
蓋敘其所已然而勉其所未至亦人所說而從者也

曰君予不惠若茲多誥予惟用閔于天越民

周公言我
不順於理

而若茲諄復之多誥耶予惟用憂天命之不終及斯民之無賴也韓子言畏天命而悲人窮亦此意前言若茲誥故此言若茲多誥周公之告公曰嗚呼君惟乃知民召公其言語之際亦可悲矣

德亦罔不能厥初惟其終祇若茲往敬用治

上章言天命民心而

民心又天命之本也故卒章專言民德以終之周公歎息謂召公踐歷諳練之久惟汝知民之德民德謂民心之嚮順亦罔不能其初今日固罔尤違矣當思其終則民之難保者尤可畏也其祇順此誥往敬用治不可忽也此召公已留周公飭遣就職之辭厥後召公既相成王又相康王再世猶未釋其政有味於周公之言也夫

蔡仲之命

蔡國名仲字蔡叔之子也叔沒周公以仲賢命諸成王復封之蔡此其誥

命之辭也今文無古文有○按此篇次敘當在洛誥之前

惟周公位冢宰正百工羣叔流言乃致辟管叔于商囚
蔡叔于郭鄰以車七乘降霍叔于庶人三年不齒蔡仲
克庸祗德周公以為卿士叔卒乃命諸王邦之蔡

周公位冢

宰正百工武王崩時也郭鄰孔氏曰中國之外地名蘇氏曰郭號也周禮六遂五家為鄰管霍國名武王崩成王幼周公居冢宰百官總已以聽者古今之通道也當是時三叔以主少國疑乘商人之不靖謂可惑以非義遂相與流言倡亂以搖之是豈周公一身之利害乃欲顛覆社稷塗炭生靈天討所加非周公所得已也故致辟管叔于商致辟云者誅戮之也囚蔡叔于郭鄰以車七乘囚云者制其出入而猶從以七乘之車也降霍叔于庶人三年不齒三年之後方齒錄以復其國也三叔刑罰之輕重因其罪之大小而已仲叔之子克常敬德

周公以為卿士叔卒乃命之成王而封之蔡也周公用仲
佐成王食邑於圻內圻內諸侯孟仲二卿故周公用仲
為卿非魯之卿也蔡左傳在淮汝之間仲不別封而命
邦之蔡者所以不絕叔於蔡也封仲以他國則絕叔於
蔡矣呂氏曰象欲殺舜舜在側微其害止於一身故舜
得遂其友愛之心周公之位則繫於天下國家雖欲遂
友愛於三叔不可得也舜與周公易地皆然史臣先書
惟周公位冢宰正百工而繼以羣叔流言所以結正三
叔之罪也後言蔡仲克庸祇德周公以為卿士叔卒即
命之王以為諸侯以見周公感然於三叔之刑幸仲克
庸祇德則亟擢用分封之也吳氏曰此所謂冢宰正百
工與詩所謂攝政皆在成王諒闇之時非以幼沖而攝
而其攝也不過位冢宰之位而已亦非如荀卿所謂攝
天子位之事也三年之喪二十五月而畢方其畢時周
公固未嘗攝亦非有七年而後還政之事也百官總己
以聽冢宰未知其所從始如殷之高宗已然不特周公

行之此皆論周公者所當先知也

王若曰小子胡惟爾率德改行克慎

厥猷肆予命爾侯于東土往即乃封敬哉

胡仲名言仲

德改父蔡叔之行能謹其道故我命汝為侯于東土往就汝所封之國其敬之哉呂氏曰敬哉者欲其無失此

心也命書之辭雖稱成王實周公之意

爾尚蓋前人之愆惟忠惟孝爾乃

邁迹自身克勤無怠以垂憲乃後率乃祖文王之彝訓

無若爾考之違王命

蔡叔之罪在於不忠不孝故仲能掩前人之愆者惟在於忠孝而已

叔違王命仲無所因故曰邁迹自身克勤無怠所謂自身也垂憲乃後所謂邁迹也率乃祖文王之彝訓無若

爾考之違王命上文所謂率德改行也

皇天無親惟德是輔民心無常惟

惠之懷為善不同同歸于治為惡不同同歸于亂爾其

戒哉

此章與伊尹申誥太甲之言相類而有深淺不同者太甲蔡仲之有間也善固不一端而無不可行

之善惡亦不一端而無可為之惡爾其可不戒之哉慎厥初惟厥終終以不困不

惟厥終終以困窮

惟思也窮困之極也思其終者所以謹其初也

懋乃攸績睦

乃四鄰以蕃王室以和兄弟康濟小民

勉汝所立之功親汝四鄰之國蕃屏

王家和協同姓康濟小民五者諸侯職之所當盡也

率自中無作聰明亂舊章詳乃

視聽罔以側言改厥度則予一人汝嘉

率循也無母同詳審也中者心

之理而無過不及之差者也舊章者先王之成法厥度者吾身之法度皆中之所出者作聰明則喜怒哀惡皆

出於私而非中矣其能不亂先王之舊章乎戒其本於己者然也側言一偏之言也視聽不審惑於一偏之說則非中矣其能不改吾身之法度乎戒其徇於人者然也仲能戒是則我一人汝嘉矣呂氏曰作聰明者非天作之聰明特沾沾小智耳

王曰嗚呼小子胡汝往哉無荒

棄朕命

飭往就國戒其毋廢棄我命汝所言也

多方

成王即政奄與淮夷又叛成王滅奄歸作此篇按費誓言徂茲淮夷徐戎並興即其

事也疑當時扇亂不特殷人如徐戎淮夷四方容或有之故及多方亦誥體也今古文皆有

○蘇氏曰大誥康誥酒誥梓材召誥洛誥多士多方八篇雖所誥不一然大略以殷人心不服

周而作也予讀泰誓武成常怪周取殷之易及讀此八篇又怪周安殷之難也多方所誥不止

般人也乃及四方之士是紛紛焉不心服者非獨
般人也予乃今知湯以下七王之德深矣方殷
之虐人如在膏火中歸周如流不暇念先王之
德及天下初定人自膏火中出即念殷先七王
如父母雖以武王周公之聖相繼撫之而莫能
禦也夫以西漢道德比之殷猶砥硤之與美玉
然王莽公孫述隗囂之流終不能使人忘漢光
武成功若建瓴然使周無周公則亦殆矣此周
公之所以畏
而不敢去也

惟五月丁亥王来自奄至于宗周

成王即政之明年商奄又叛成王征滅之

杜預云奄不知所在宗周鎬京也呂氏曰王者定都天
下之所宗也東遷之後定都于洛則洛亦謂之宗周衛
孔悝之鼎銘曰隨難于漢陽即宮于宗周是時鎬已封
秦宗周蓋指洛也然則宗周初無定名隨王者所都而

名耳 周公曰王若曰猷告爾四國多方惟爾殷侯尹民我

惟大降爾命爾罔不知呂氏曰先曰周公曰而復曰王若曰何也明周公傳王命而非

周公之命也周公之命詰終於此篇故發例於此以見大誥諸篇凡稱王曰者無非周公傳成王之命也成王

滅奄之後告諭四國殷民而因以曉天下也所主殷民故又專提殷侯之正民者告之言殷民罪應誅戮我大

降宥爾命爾宜無不知也洪惟圖天之命弗永寅念于祀圖謀也言商奄大惟

私意圖謀天命自底滅亡不長敬念以保其祭祀呂氏曰天命可受而不可圖圖則人謀之私而非天命之

公矣此蓋漢示以天命不可妄干乃多方一篇之綱惟領也下文引夏商所以失天命受天命者以明示之

帝降格于夏有夏誕厥逸不肯感言于民乃大淫昏不

克終日勸于帝之迪乃爾攸聞

言帝降災異以謹告祭祭不知戒懼乃大肆逸

豫憂民之言尚不肯出諸口况望其有憂民之實乎勸勉也迪啓迪也視聽動息日用之間洋洋乎皆上帝所

以啓迪開導斯人者祭乃大肆淫昏終日之間不能少勉於是天理或幾乎息矣况望有惠迪而不違乎此乃

爾之所聞欲其因祭而知紂也厥逸與多士引逸不同者猶亂之為亂為治耳逸豫以民言淫昏以帝言各以

其義也此章上疑有闕文厥圖帝之命不克開于民之麗乃大降罰

崇亂有夏因甲于內亂不克靈承于旅罔丕惟進之恭

洪舒于民亦惟有夏之民叨懣日欽劓割夏邑

叨他刀反懣陟

利反○此章文多未詳麗猶日月麗乎天之麗謂民之所依以生者也依於土依於衣食之類甲始也言祭矯

誣上天圖度帝命不能開民衣食之原於民依恃以生者一皆抑塞遏絕之猶乃大降威虐于民以增亂其國其所因則始于內嬖蠱其心敗其家不能善承其衆不能大進於恭而大寬裕其民亦惟夏邑之民貪叨忿懣者則日欽崇而尊用之以戕害於其國也

天惟時求民主乃大降顯休命于

成湯刑殄有夏

言天惟是為民求主耳桀既不能為民主天乃大降顯休命于成湯使為民

主而伐夏殄滅之也○呂氏曰曰求曰降豈真有求之降之者哉天下無統渙散漫流勢不得不歸其所聚而湯之一德乃所謂顯休命之實一衆離而聚之者也民不得不聚于湯湯不得不受斯民之聚是豈人為之私哉故曰天求惟天不畀純乃惟以爾多方之義民不克之天降之也

永于多享惟夏之恭多士大不克明保享于民乃胥惟

虐于民至于百為大不克開

純大也義民賢者也言天不與桀者大乃以爾多方

賢者不克永于多享以至于亡也言桀於義民不能用其所敬之多士率皆不義之民上文所謂叨憺日欽者同惡相濟大不能明保享于民乃相與播虐于民民無所措其手足凡百所為無一能達上文所謂不克開于民之麗者政暴民窮所以速其亡也此雖指桀多士爾殷侯尹民嘗逮事紂者寧不惕然內愧乎乃惟

成湯克以爾多方簡代夏作民主

簡擇也民擇湯而歸之

慎厥麗

乃勸厥民刑用勸

湯深謹其所依以勸勉其民故民皆儀刑而用勸勉也人君之于天下仁

而已矣仁者君之所依也君仁則莫不仁矣

以至于帝乙罔不明德慎罰亦

克用勸

明德則民愛慕之謹罰則民畏服之自成湯至于帝乙雖歷世不同而皆知明其德謹其罰故

亦能用以勸勉其民也明德謹罰所以謹

要囚殄戮多

罪亦克用勸開釋無辜亦克用勸

德明之而已罰有辟焉有宥焉故再言辟

而當罪亦能用以勸勉宥而赦過亦能用以勸勉言辟與宥皆足以使人勉於善也

今至于爾辟

弗克以爾多方享天之命

呂氏曰爾辟謂紂也商先哲王世傳家法積累維持如此

今一旦至于汝君乃以爾全盛之多方不克坐享天命而亡之是誠可閔也天命至公操則存舍則亡以商先王之多基圖之大紂曾不得席其餘蔭其亡忽焉危微操舍之幾周公所以示天下深矣豈徒曰慰解之而已哉

嗚呼王若曰誥告爾多方非天庸釋有夏非天庸釋

有殷

先言嗚呼而後言王若曰者唐孔氏曰周公先自歎息而後稱王命以誥之也庸用也有心之謂釋

去之也。上文言夏殷之亡，因言非天有心於去夏亦非天有心於去殷。下文遂言乃惟桀紂自取滅亡也。○呂

氏曰：周公先自歎息而始宣布成王之誥，告以見周公未嘗稱王也。又此篇之始，周公曰：王若曰。複語相承，書

無此體也。至於此章，先嗚呼而後王若曰。書亦無此體也。周公居聖人之變，史官豫憂來世，傳疑襲誤，蓋有竊

之為口實矣。故於周公誥命終篇發新例二著。周乃惟公實未嘗稱王，所以別嫌明微而謹萬世之防也。乃惟

爾辟以爾多方大淫圖天之命，屑有辭。

紂以多方之富大肆淫佚圖度

天命瑣屑有辭與多士言桀大淫佚有辭義同殷之亡非自取乎以下二章推之此章之上當有闕文乃

惟有夏圖厥政不集于享，天降時喪有邦間之。

集萃也享享有

之享樂圖其政不集于享而集于亡故天降是喪亂而俾有殷代之夏之亡非自取乎

乃惟爾商

後王逸厥逸圖厥政不蠲烝天惟降時喪

紂以逸居逸

淫酒無度故其為政不蠲潔而穢惡不烝進而怠惰天以是降喪亡于殷殷之亡非自取乎此上三節皆應上

文非天庸釋之語

惟聖罔念作狂惟狂克念作聖天惟五年須

暇之子孫誕作民主罔可念聽

聖通明之稱言聖而罔念則為狂矣愚而能念

則為聖矣紂雖昏愚亦有可改過遷善之理故天人未忍遽絕之猶五年之久須待暇寬於紂觀其克念大為民主而紂無可念可聽者五年必有指實而言孔氏牽合歲月者非是或曰狂而克念果可為聖乎曰聖固未易為也狂而克念則作聖之功知所向方太甲其庶幾矣聖而罔念果至於狂乎曰聖固無所謂罔念也禹戒舜曰無若丹朱傲惟慢遊是好一念之差雖未至於狂而狂之理亦在是矣此人心惟危聖人拳拳告戒豈無

哉意天惟求爾多方大動以威開厥顧天惟爾多方罔堪

顧之

紂既罔可念聽天於是求民主於爾多方大警動以祿祥譴告之威以開發其能受眷顧之命者而

爾多方之衆皆不足以堪眷顧之命也

惟我周王靈承于旅克堪用德惟

典神天天惟式教我用休簡畀殷命尹爾多方

典主式用也克

堪者能勝之謂也德輜如毛民鮮克舉之言德舉者莫能勝也文武善承其衆克堪用德是誠可以為神天之

主矣故天式教文武用以休美簡擇畀付殷命以正爾多方也呂氏曰式教用休者如之何而教之也文武既

得乎天天德日新左右逢原其思也若或起之其行也若或翼之乃天之所以教而用以昌大休明者也非諄

諄然而教之也此章深論天下向者天命未定眷求民主之時能者則得之孰有遏汝者乃無一能當天之眷

今天既命我周而定于一矣爾猶洶洶不靖欲何為
耶明指天命而警服四海姦雄之心者莫切於是今

我曷敢多誥我惟大降爾四國民命

言今我何敢如此多誥我惟大降宥

爾四國民命舉其宥過之恩而責其遷善之實也

爾曷不忱裕之于爾多方爾

曷不夾介乂我周王享天之命今爾尚宅爾宅畋爾田爾

曷不惠王熙天之命

夾訖洽反○夾夾輔之夾介賓介之介爾何不誠信寬裕於爾之多

方乎爾何不夾輔介助我周王享天之命乎爾之叛亂據法定罪則諸其宅收其田可也今爾猶得居爾宅耕爾田爾何不順我王室各守爾典以廣天命乎此三節責其何不如也爾乃迪屢不靜爾

心未愛爾乃不大宅天命爾乃屑播天命爾乃自作不

典圖忱于正

爾乃屢蹈不靖自取亡滅爾心其未知所以自愛耶爾乃大不安天命耶爾乃輕棄

天命耶爾乃自為不法欲圖見信于正者以為當然耶此四節責其不可如此也

我惟時其教

告之我惟時其戰要囚之至于再至于三乃有不用我

降爾命我乃其大罰殛之非我有周秉德不康寧乃惟

爾自速辜

我惟是教告而誨諭之我惟是戒懼而要囚之今至于再至于三矣爾不用我降宥爾命

而猶狃於叛亂反覆我乃其大罰殛殺之非我有周持德不安静乃惟爾自為凶逆以速其罪爾

王曰

嗚呼猷告爾有方多士暨殷多士今爾奔走臣我監五

祀

監監洛邑之遷民者也猶諸侯之分民有君道焉所以謂之臣我監也古商士遷洛奔走臣服我監於今

五年矣不曰年而曰祀者因商俗而言也又按成周既成而成王即政成王即政而商奄繼叛事皆相因繞一二年耳今言五祀則商民之遷越惟有胥伯小大多正固在作洛之前矣尤為明驗

爾罔不克臬

臬事也周官多以胥以伯以正為名胥伯小大衆多之正蓋殷多士授職於洛共長

治遷民者也其奔走臣我監亦久矣宜相體自作不和悉竭力其職無或反側偷情而不能事也

爾惟和哉爾室不睦爾惟和哉爾邑克明爾惟克勤乃

事

心不安靜則身不和順矣身不安靜則家不和順矣言爾惟和哉者所以勸勉之也和其身睦其家而後

能協于其邑驩然有恩以相愛聚然有文以相接爾邑克明始為不負其職而可謂克勤乃事矣前既戒以罔

不克臬故以克爾尚不忌于凶德亦則以穆穆在乃位勤乃事期之也

克閱于乃邑謀介

忌畏也穆穆和敬貌頑民誠可畏矣然如上文所言爾多士庶幾不至畏

忌頑民凶德亦則以穆穆和敬端處爾位以潛消其悍逆悖戾之氣又能簡閱爾邑之賢者以謀其助則民之頑者且革而化矣尚何可畏之有哉成王誘掖商士爾之善以化服商民之惡其轉移感動之機微矣哉爾

乃自時洛邑尚永力畋爾田天惟畀矜爾我有周惟其

大介賚爾迪簡在王庭尚爾事有服在大僚

爾乃自時洛邑庶幾

可以保有其業力畋爾田天亦將畀予矜憐於爾我有周亦將大介助賚錫於爾啓迪簡拔置之王朝矣其庶幾勉爾之事有服在大僚不難至也多士篇商民嘗以夏迪簡在王庭有服在百僚為言故此因以勸勵之也

王曰嗚呼多士爾不克勸忱我命爾亦則惟不克享凡

民惟曰不享爾乃惟逸惟頗大遠王命則惟爾多方探天

之威我則致天之罰離逖爾土

誥告將終乃歎息言爾多士如不能相勸信我

之誥命爾亦則惟不能享上凡爾之民亦惟曰上不必享矣爾乃放逸頗僻大違我命則惟爾多士自取天威我亦致天之罰播流蕩析俾爾離遠爾土矣爾雖欲宅爾宅畋爾田尚可得哉多方疑當作多士上章既勸之以休此章則董之以威商民不惟有所慕而不敢違越且有所畏而不敢違越矣王曰我不惟

多誥我惟祇告爾命

我豈若是多言哉我惟敬告爾以上文勸勉之命而已

又曰

時惟爾初不克敬于和則無我怨

與之更始故曰時惟爾初也爾民至此苟

又不能敬于和猶復乖亂則自底誅戮毋我怨尤矣開其為善禁其為惡周家忠厚之意於是篇尤為可見○

呂氏曰又曰二字所以形容周公之惓惓斯民命已畢而猶有餘情誥已終而猶有餘語顧盼之光猶曄然溢於簡冊也

立政

吳氏曰此書戒成王以任用賢才之道而其旨意則又上戒成王專擇百官有司之

長如所謂常伯常任準人等云者蓋古者外之諸侯一卿已命於君內之卿大夫則亦自擇其屬如周公以蔡仲為卿士伯冏謹簡乃僚之類其長既賢則其所舉用無不賢者矣葛氏曰誥體也今文古文皆有

周公若曰拜手稽首告嗣天子王矣用咸戒于王曰王左右常伯常任準人綴衣虎賁周公曰嗚呼休茲知恤

鮮哉

綴朱衛丁劣二反賁音奔○此篇周公所作而記之者周史也故稱若曰言周公帥羣臣進戒于王

贊之曰拜手稽首告嗣天子王矣羣臣用皆進戒曰王左右之臣有牧民之長曰常伯有任事之公卿曰常任

有守法之有司曰準人三事之外掌服器者曰綴衣執射御者曰虎賁皆任用之所當謹者周公於是歎息言

曰美矣此官然知憂恤者鮮矣言五等官職之美而知憂其得人者少也吳氏曰綴衣虎賁近臣之長也葛氏

曰綴衣周禮司服之類也古之人迪惟有夏乃有室大競虎賁周禮之虎賁氏也

籲俊尊上帝迪知忱恂于九德之行乃敢告教厥后曰

拜手稽首后矣曰宅乃事宅乃牧宅乃準茲惟后矣謀

面用丕訓德則乃宅人茲乃三宅無義民

恂音荀○古之人有行此

道者惟有夏之君當王室大強之時而求賢以為事天之實也迪知者蹈知而非苟知也忱恂者誠信而非輕信也言夏之臣蹈知誠信于九德之行乃敢告教其君曰拜手稽首后矣云者致敬以尊其為君之名也曰宅乃事宅乃牧宅乃準茲惟后矣云者致告以叙其為君之實也茲者此也言如此而後可以為君也即臯陶與禹言九德之事謀面者謀人之面貌也言非迪知忱恂于九德之行而徒謀之面貌用以為大順於德乃宅而任之如此則三宅之人豈復有賢者乎蘇氏曰事則向所謂常任也牧則向所謂常伯也準則向所謂準人也是一篇之中所論宅俊者參差不齊然大要不出是三者其餘則皆小臣百執事也吳氏曰古者凡以善言語人皆謂之教不必自上**桀德惟乃弗作往任是惟暴德**因教下而後謂之教也

後

夏桀惡德弗作往昔先王任用三宅而所任者乃惟暴德之人故桀以喪亡無後

亦越成湯

陟丕釐上帝之耿命乃用三有宅克即宅曰三有俊克
即俊嚴惟丕式克用三宅三俊其在商邑用協于厥邑

其在四方用丕式見德

亦越者繼前之辭也耿光也湯自七十里升為天子典禮命討

昭著于天下所謂陟丕釐上帝之光命也三宅謂居常伯常任準人之位者三俊謂有常伯常任準人之才者克即者言湯所用三宅實能就是位而不曠其職所稱三俊實能就是德而不浮其名也三俊說者謂他日次補三宅者詳宅以位言俊以德言意其儲養待用或如說者所云也惟思式法也湯於三宅三俊嚴思而丕法之故能盡其宅俊之用而宅者得以效其職俊者得以著其才賢知奮庸登於至治其在商邑用協于厥邑近者察之詳其情未易齊畿甸之協則純之至也其在四方用丕式見德遠者及之難其德未易偏觀法之同則

大之至也至純至大治道無餘蘊矣
曰邑曰四方者各極其遠近而言耳
嗚呼其在受德賢

惟羞刑暴德之人同于厥邦乃惟庶習逸德之人同于

厥政帝欽罰之乃侔我有夏式商受命奄甸萬姓
啓音敏奄

衣檢反○蓋刑進任刑戮者也庶習備諸衆醜者也言
紂德強暴又所與共國者惟蓋刑暴德之諸侯所與共

政者惟庶習逸德之臣下上帝敬致其罰乃使我周有
此諸夏用商所受之命而奄甸萬姓焉甸者井牧其地

什伍其民也
亦越文王武王克知三有宅心灼見三有俊心

以敬事上帝立民長伯
三宅三俊文武克知灼見皆曰心者即所謂迪知忱恂而非謀

面也三宅已授之位故曰克知三俊未任以事故曰灼
見以是敬事上帝則天職修而上有所承以是立民長

伯則體統立而天下有所寄人君位天人之兩間而俯仰無怍者以是也夏之尊帝商之丕釐周之敬事其義一

也長如王制所謂五國以為屬屬有長伯如立政任人王制所謂二百一十國以為州州有伯是也

準夫牧作三事

言文武立政三宅之官也任人常任也準夫準人也牧常伯也以職言故曰事

虎賁綴衣趣馬小尹左右攜僕百司庶府

此侍御之官也趣馬掌馬

之官小尹小官之長攜僕攜持僕御之人百司若司裘司服庶府若內府太府之屬也

大都小伯

藝人表臣百司太史尹伯席常吉士

此都邑之官也呂氏曰大都小伯者

謂大都之伯小都之伯也大都言都不言伯小伯言伯不言都互見之也藝人者卜祝巫匠執技以事上者表

臣百司表外也表對裏之詞上文百司蓋內百司若內府內司服之屬所謂裏臣也此百司蓋外百司若外府

外司服之屬所謂表臣也太史者史官也尹伯者有司
之長如庖人內饗膳夫則是數尹之伯也鍾師尹鍾磬
師尹磬大師司樂則是數尹之伯也凡所謂官吏莫不
在內外百司之中至於特見其名者則皆有意焉虎賁
綴衣趣馬小尹左右攜僕以扈衛親近而見庶府以冗
賤人所易忽而見藝人恐其或興淫巧機詐以蕩上心
而見太史以奉諱惡公天下後世之是非而見尹伯以
大小相維體統所係而見若大都小伯則分治郊畿不
預百司之數者既條陳歷數文武之廷無非常德吉士也
庶常吉士庶衆也言在文武之廷無非常德吉士也

司徒司馬司空亞旅

此諸侯之官也司徒主邦政司空主邦土餘見牧誓言

諸侯之官莫不得人也諸侯之官
獨舉此者以其名位通於天子歟
夷微盧丞三亳阪尹

此王官之監於諸侯四夷者也微盧見經亳見史三亳
蒙為北亳穀熟為南亳偃師為西亳丞或以為衆或以

為夷名阪未詳古者險危之地封疆之守或不以封而使王官治之參錯於五服之間是之謂尹地志載王官所治非一此特舉其重者耳自諸侯三卿以降惟列官名而無他語承上庶常吉士之文以內見外也夫上自王朝內而都邑外而諸侯遠而夷狄莫不皆得人以為官使何其盛歟

文王惟克厥宅心

乃克立茲常事司牧人以克俊有德

文王惟能其三宅之心能者能之也

知之至信之篤之謂故能立此常任常伯用能俊有德也
不言準人者因上章言文王用人而申克知三有宅心之說故
文王罔攸兼于庶言庶獄庶慎惟有司之牧

夫是訓用違

庶言號令也庶獄獄訟也庶慎國之禁戒備儲也有司有職主者牧夫牧人也文王

不敢下侵庶職惟於有司牧夫訓勅用命及庶獄庶慎違命者而已漢孔氏曰勞於求才逸於任賢
庶獄庶慎

文王罔敢知于茲

上言罔攸兼則猶知之特不兼其事耳至此罔敢知則若未嘗知有其事

蓋信任之益專也

上言庶言此不及者號令出於君有不容不知者故也

呂氏曰不曰罔知于茲而曰罔敢知于茲者徒言罔知則是莊老之無為也惟言罔敢知然後見文王敬畏思不出位之意毫釐之辨學者宜精察

之亦越武王率惟敕功不敢替厥義德率惟謀從容德

以並受此丕丕基

率循也敕功安天下之功義德義德之人容德容德之人蓋義德者有撥

亂反正之才容德者有休休樂善之量皆成德之人也

周公上文言武王率循文王之功而不敢替其所用義

德之人率循文王之謀而不敢違其容德之士意如號叔閔天散宜生泰顛南宮括之徒所以輔成王業者文

用之於前武任之於後故周公於君爽言五臣克昭文王受有殷命武王惟茲四人尚迪有祿正猶此敘文武

用人而言並受此丕丕基也

嗚呼孺子王矣繼自今我其立政立事

準人牧夫我其克灼知厥若丕乃俾亂相我受民和我

庶獄庶慎時則勿有間之

我者指王而言若順也周公既述文武基業之大歎息而

言曰孺子今既為王矣繼此以往王其於立政立事準人牧夫之任當能明知其所順順者其心之安也孔子

曰察其所安人焉廋哉察其所順者知人之要也夫既明知其所順果正而不他然後推心而大委任之使展

布四體以為治相助左右所受之民和調均齊獄慎之事而又戒其勿以小人間之使得終始其治此任人之

要也民而謂之受者言民者乃受之於天受之於祖宗非成王之所自有也

自一話一言我

則末惟成德之彥以乂我受民

末終惟思也自一話一言之間我則終思成德

之美士以治我所受之民而不敢斯須忘也

嗚呼予旦已受人之徽言咸告

孺子王矣繼自今文子文孫其勿誤于庶獄庶慎惟正

是又之

前所言禹湯文武任人之事無非至美之言我聞之於人者已皆告孺子王矣文子文孫者成

王武王之文子文王之文孫也成王之時法度彰禮樂著守成尚文故曰文誤失也有所無有所知不付之有

司而以己誤之也正猶康誥所謂正人與宮正酒正之正指當職者為言不以己誤庶獄庶慎惟當職之人是治之下文言其勿誤庶獄

自古商人亦越我周文王立

政立事牧夫準人則克宅之克由繹之茲乃俾乂

自古及商

人及我周文王於立政所以用三宅之道則克宅之者能得賢者以居其職也克由繹之者能紬繹用之而盡

其才也既能宅其才以安其職人能繹其才以盡其用茲其所以能俾乂也歟

國則罔有立政

用儉人不訓于德是罔顯在厥世繼自今立政其勿以

儉人其惟吉士用勸相我國家

勸音邁○自古為國無有立政用儉利小人者

小人而謂之儉者形容其沾沾便捷之狀也儉利小人不順于德是無能光顯以在厥世王當繼今以往立政

勿用儉利小人其惟用有常吉士使勉力以輔相我國家也呂氏曰君子陽類用則升其國於明昌小人陰類用則降其國於晦昧陰陽升降亦各從其類也今文子文孫孺子王矣其勿誤

于庶獄惟有司之牧夫

始言和我庶獄庶慎時則勿有間之繼言其勿誤于庶獄庶慎

惟正是乂之至是獨曰其勿誤于庶獄惟有司之牧夫蓋刑者天下之重事挈其重而獨舉之使成王尤知刑

獄之可畏必專有司收夫其克詰爾戎兵以陟禹之迹之任而不可以已誤之也

方行天下至于海表罔有不服以觀文王之耿光以揚

武王之大烈詰治也治爾戎服兵器也陟升也禹迹禹服舊迹也方四方也海表四裔也言德威

所及無不服也覲見也耿光德也大烈業也於文王稱德於武王稱業各於其盛者稱之呂氏曰兵刑之大也

故既言庶獄而繼以治兵之戒焉或曰周公之訓稽其所弊得無啓後世好大喜功之患乎曰周公詰兵之訓

繼勿誤庶獄之後并獄之間尚恐一刑之誤況六師萬衆之命其敢不審而誤舉乎推勿誤庶獄之心而奉克

詰戎兵之戒必非得已嗚呼繼自今後王立政其惟克不己而輕用民命者也

用常人并周家後王而戒之也常人常德之人也臯陶曰彰厥有常吉哉常人與吉士同實而異名者

也周公若曰太史司寇蘇公式敬爾由獄以長我王國

茲式有慎以列用中罰

此周公因言慎罰而以蘇公敬獄之事告之太史使其并書以

為後世司獄之式也蘇國名也左傳蘇忿生為司寇用能敬其所由之獄
寇周公告太史以蘇忿生為司寇用能敬其所由之獄
培植基本以長我王國令於此取法而有謹焉
則能以輕重條列用其中罰而無過差之患矣

書經卷五



覆校官助教臣金學詩

校對官庶吉士臣王坦修

膳錄監生臣張承恩

欽定四庫全書薈要

經部
書經集傳卷六



詳校官祭酒臣韋謙恒

書經卷六

宋 蔡沈 集傳

周官

成王訓迪百官吏錄其言以周官名之亦訓體也今文無古文有○按此篇與今周

禮不同如三公三孤周禮皆不載或謂公孤兼官無正職故不載然三公論道經邦三孤貳公弘化非職乎職任之大無踰此矣或又謂師氏即太師保氏即太保然以師保之尊而反屬司徒之職亦無是理也又此言六年五服一朝而周禮六服諸侯有一歲一見者二歲一見者三歲一見者亦與此不合是固可疑然周禮非聖人不能作也意周公方條治事之官而未及師保之職所謂未及者鄭重而未及言之也書未成而公亡其間法制有未施用故與此異而冬



官亦缺要之周禮首末未備周公未成之書也
惜哉讀書者參互而考之則周公經制可得而
論矣

惟周王撫萬邦巡侯甸四征弗庭綏厥兆民六服羣辟

罔不承德歸于宗周董正治官

此書之本序也庭直也葛氏曰弗庭弗來庭者

六服侯甸男采衛并畿內爲六服也禹貢五服通畿內周制五服在王畿外也周禮又有九服侯甸男采衛蠻夷鎮蕃與此不同宗周鎬京也董督也治官凡治事之官也言成王撫臨萬國巡狩侯甸四方征討不庭之國以安天下之民六服諸侯之君無不奉承周德成王歸于鎬京督正治事之官外攘之功舉而益嚴內治之修也唐孔氏曰周制無萬國惟
王曰若昔大猷制治于未
戕淮夷非四征也大言之爾

亂保邦于未危

治去聲○若昔大道之世制治保邦于未亂未危之前即下文明王立政是也

曰唐虞稽古建官惟百內有百揆四岳外有州牧侯伯

庶政惟和萬國咸寧夏商官倍亦克用乂明王立政不

惟其官惟其人

倍薄亥反○百揆無所不總者四岳總其方岳者州牧各總其州者侯伯次州

牧而總諸侯者也百揆四岳總治于內州牧侯伯總治于外內外相承體統不紊故庶政惟和而萬國咸寧夏商之時世變事繁觀其會通制其繁簡官數加倍亦能用治明王立政不惟其官之多惟其得人而已

今

予小子祇勤于德夙夜不逮仰惟前代時若訓迪厥官

逮徒耐反又湯亥大計二反○逮及時是若順也成王祇勤于德早夜若有所不及然蓋脩德者任官之本也

立太師太傅太保茲惟三公論道經邦變理陰陽官不

必備惟其人

立始辭也三公非始於此立爲周家定制則始於此也賈誼曰保者保其身體傳者

傳之德義師道之教訓此所謂三公也陰陽以氣言道者陰陽之理恒而不變者也易曰一陰一陽之謂道是也論者講明之謂經者經綸之謂變理者和調之也非經綸天下之大經參天地之化育者豈足以任此責故官不必備惟其人也少師少傅少保曰三孤貳公弘化寅亮天地

弼予一人

少失照反○孤特也三少雖三公之貳而非其屬官故曰孤天地以形言化者天地之用

運而無迹者也易曰範圍天地之化是也弘者張而大之寅亮者敬而明之也公論道孤弘化公變理陰陽孤寅亮天地公論於前孤冢宰掌邦治統百官均四海大冢

弼於後公孤之分如此

宰治也。天官卿治官之長，是爲冢宰。內統百官，外均四海。蓋天子之相也。百官異職，管攝使歸于一，是之謂統。

四海異宜，調劑使得其平，是之謂均。司徒掌邦教，敷五典，擾兆民。擾，馴也。地官卿

主國教化，數君臣父子夫婦長幼朋友五者之教，以馴擾兆民之不順者而使之順也。唐虞司徒之官，固已職

掌如宗伯掌邦禮，治神人和上下。春官卿主邦禮，治天此神地祇人鬼之事，和

上下尊卑等列，春官於四時之序爲長，故其官謂之宗伯。成周合樂於禮，官謂之和者，蓋以樂而言也。司

馬掌邦政，統六師，平邦國。夏官卿主戎馬之事，掌國征伐，統御六軍，平治邦國，平謂

強不得陵弱，衆不得暴寡，而人皆得其平也。軍政莫急於馬，故以司馬名官。何莫非政，獨戎政謂之政者，用以

征伐而正彼之不正，王政之大者也。司寇掌邦禁，詰姦慝，刑暴亂。秋官卿主寇賊

法禁羣行攻劫曰寇詰姦慝刑強暴作亂者掌刑不曰刑而曰禁者禁於未然也呂氏曰姦慝隱而難知故謂

之詰推鞠窮詰而求其情也

司空掌邦土居四民時地

暴亂顯而易見直刑之而已

利

冬官卿主國空土以居士農工商四民順天時以興地利按周禮冬官則記考工之事與此不同蓋本闕

冬官漢儒以考工記當之也

六卿分職各率其屬以倡九牧阜成兆

民

六卿分職各率其屬官以倡九州之牧自內達之於外政治明教化洽兆民之衆莫不阜厚而化成也按

周禮每卿六十屬六卿三百六十屬也呂氏曰冢宰相天子統百官則司徒以下無非冢宰所統乃均列一職而併數之爲六者網在網中也乾坤之與六子並列於八方冢宰之與五卿並列於六職也

六年五

服一朝又六年王乃時巡考制度于四岳諸侯各朝于

方岳大明黜陟

五服侯甸男采衛也六年一朝會京師十二年王一巡狩時巡者猶舜之四仲

巡狩也考制度者猶舜之協時月正日同律度量衡等事也諸侯各朝方岳者猶舜之肆覲東后也大明黜陟者猶舜之黜陟幽明也疏數異時繁簡異制帝王之治因時損益者可見矣

王曰嗚呼凡我

有官君子欽乃攸司慎乃出令令出惟行弗惟反以公

減私民其允懷

建官之體統前章既訓迪之矣此則居守官職者咸在曰凡有官君子者合尊

卑小大而同訓之也反者令出不可行而壅逆之謂言敬汝所主之職謹汝所出之令令出欲其行不欲其壅逆而不行也以天下之公理減一己之私情則令行而民莫不敬信懷服矣

學古入官議事

以制政乃不迷其爾典常作之師無以利口亂厥官蓄

疑敗謀怠忽荒政不學牆面莅事惟煩

蓄勅六反○學古學前代之法

也制裁度也迷錯謬也典常當代之法也周家典常皆文武周公之所講畫至精至備凡莅官者謹師之而已不可喋喋利口更改而紛亂之也積疑不決必敗其謀怠情忽略必荒其政人而不學其猶正牆面而立必無所見而舉錯煩擾也○蘇氏曰鄭子產鑄刑書晉叔向譏之曰昔先王議事以制不爲刑辟其言蓋取諸此先王人法並任而任人爲多故律設大法而已其輕重之詳則付之人臨事而議以制其出入故刑簡而政清自唐以前治罪科條止於今律令而已人之所犯日變無窮而律令有限以有限治無窮不聞有所闕豈非人法兼行吏猶得臨事而議乎今律令之外科條數萬而不足於用有司請立新法者日益不已嗚呼任法之弊一至於此哉

戒爾卿士功崇惟志業廣惟勤惟克果斷乃罔後

艱

斷都玩反○此下申戒卿士也王氏曰功以志崇業以仁廣斷以勇克此三者天下之達道也呂氏曰功

者業之成也業者功之積也崇其功者存乎志廣其業者存乎勤勤由志而生志待勤而遂雖有二者當幾而不能果斷則志與勤虛用而終蹈後艱矣位不期驕祿不期侈恭儉惟德無

載爾僞作德心逸日休作僞心勞日拙

載作代反○貴不與驕期而驕

自至祿不與侈期而侈自至故居是位當知所以恭饗是祿當知所以儉然恭儉豈可以聲音笑貌爲哉當有實得於已不可從事於僞作德則中外惟一故心逸而日休休焉作僞則揜護不暇故心勞而日著其拙矣或日期待也位所以崇德非期於爲居寵思危罔不惟畏驕祿所以報功非期於爲侈亦通

弗畏入畏

居寵盛則思危辱當無所不致其祇畏苟不知祇畏則入于可畏之中矣後之患失者與

思危相似然思危者以寵利爲憂患
失者以寵利爲樂所存大不同也

推賢讓能庶官乃

和不和政庀舉能其官惟爾之能稱匪其人惟爾不任

推通回切庀莫江切○賢有德者也能有才者也王氏
曰道二義利而已推賢讓能所以爲義大臣出於義則
莫不出於義此庶官所以不爭而和蔽賢害能所以爲
利大臣出於利則莫不出於利此庶官所以爭而不和
庶官不和則政必雜亂而不理矣稱亦舉也所舉之人
能修其官是亦爾之所能舉非其人是亦爾不勝任古
者大臣以人事
君其責如此
王曰嗚呼三事暨大夫敬爾有官亂爾

有政以佑乃辟永康兆民萬邦惟無斁

辟必益反斁音
亦○三事即立

政三事也亂治也篇終歎息上自三事下至大夫而申
戒勅之也其不及公孤者公孤德尊位隆非有待於戒

也勅

君陳

君陳臣名唐孔氏曰周公遷殷頑民於下都周公親自監之周公既殁成王命君陳

代周公此其策命之詞史錄其書以君陳名篇今文無古文有

王若曰君陳惟爾令德孝恭惟孝友于兄弟克施有政

命汝尹茲東郊敬哉

言君陳有令德事親孝事上恭惟其孝友於家是以能施政於邦孔

子曰居家理故治可移於官陳氏曰天子之國五十里爲近郊自王城言之則下都乃東郊之地故君陳畢命皆指下都爲東郊
昔周公師保萬民民懷其德往慎乃司茲率

厥常懋昭周公之訓惟民其乂

周公之在東郊有師之尊有保之親師教之保

安之民懷其德君陳之往但當謹其所司率循其常勉明周公之舊訓則民其治矣蓋周公既歿民方思慕周公之訓君陳能發明而光我聞曰至治馨香感于神明大之固宜其翕然聽順也

黍稷非馨明德惟馨爾尚式時周公之猷訓惟日孜孜

無敢逸豫

呂氏曰成王既勉君陳昭周公之訓復舉周公精微之訓以告之至治馨香以下四語所

謂周公之訓也既言此而揭之以爾尚式時周公之猷訓則是四言爲周公之訓明矣物之精華固無二體然形質止而氣臭升止者有方升者無間則馨香者精華之上達者也至治之極馨香發聞感格神明不疾而速凡昭薦黍稷之苾芬是豈黍稷之馨哉所以苾芬者實明德之馨也至治舉其成明德循其本非有二馨香也周公之訓固爲精微而舉以告君陳尤當其可自殷頑民言之欲其感格非可刑驅而勢迫所謂洞達無間者

蓋當深省也自周公法度言之典章雖具苟無前人之德則索然華爾徒爲陳迹也故勉之以用是猷訓惟日孜孜無敢逸豫焉是訓也至精至微非日新不已深致敬篤之功孰能與於斯

凡人未見聖若

不克見既見聖亦不克由聖爾其戒哉爾惟風下民惟

草

未見聖如不能得見既見聖亦不能由聖人情皆然君陳親見周公故特申戒以此君子之德風也小人

之德草也草上之風必偃君陳克由周公之訓則商民亦由君陳之訓矣

圖厥政莫或不艱

有廢有興出入自爾師虞庶言同則繹

師衆虞庶也言圖謀其政無小

無大莫或不致其難有所當廢有所當興必出入反覆與衆共虞度之衆論既同則又紬繹而深思之而後行也蓋出入自爾師虞者所以合乎人之同庶言同則繹者所以斷於已之獨孟子曰國人皆曰賢然後察之國

人皆曰可殺然後察之
庶言同則繹之謂也

爾有嘉謀嘉猷則入告爾后于

內爾乃順之于外曰斯謀斯猷惟我后之德嗚呼臣人

咸若時惟良顯哉

言切於事謂之謀言合於道謂之猷
道與事非二也各舉其甚者言之良

以德言顯以名言或曰成王舉君陳前日已陳之善而
歎息以美之也○葛氏曰成王殆失斯言矣欲其臣善
則稱君人臣之細行也然君既有是心至於有過則將
使誰執哉禹聞善言則拜湯改過不吝端不爲此言矣
嗚呼此其所
以爲成王歟王曰君陳爾惟弘周公丕訓無依勢作威

無倚法以削寬而有制從容以和

從七恭反○此篇言
周公訓者三曰懋昭

曰式時至此則弘周公之丕訓欲其益張而大之也君
陳何至依勢以爲威倚法以侵削者然勢我所有也法

我所用也喜怒予奪毫髮不於人而於己是私意也非公理也安能不作威以削乎君陳之世當寬和之時也然寬不可一於寬必寬而有其制和不可一於和必從容以和之而後可以和平中也

殷民在辟

予曰辟爾惟勿辟予曰宥爾惟勿宥惟厥中

○辟毘亦反
○上章成

王慮君陳之徇己此則慮君陳之徇君也言殷民之在刑辟者不可徇君以爲生殺惟當審其輕重之中也

有弗若于汝政弗化于汝訓辟以止辟乃辟

其有不順于汝之政

不化于汝之訓刑之可也然刑期無刑刑而可以止刑者乃刑之此終上章之辟

狃于姦宄敗

常亂俗三細不宥

狃女九反○狃習也常典常也俗風俗也狃于姦宄與夫毀敗典常壞亂

風俗人犯此三者雖小罪亦不可宥以其所關者大也此終上章之宥

爾無忿疾于頑無

求備于一夫

無忿疾人之所未化無求備人之所不能

必有忍其乃有濟有

容德乃大

孔子曰小不忍則亂大謀必有所忍而後能有所濟然此猶有堅削力蓄之意若洪裕寬

綽恢恢乎有餘地者斯乃德之大也忍言事容言德各以深淺言也

簡厥修亦簡其或不

修進厥良以率其或不良

王氏曰修謂其職業良謂其行義職業有修與不修當簡

而別之則人勸功進行義之良者以率其不良則人勵行

惟民生厚因物有遷達上

所命從厥攸好爾克敬典在德時乃罔不變允升于大

猷惟予一人膺受多福其爾之休終有辭於永世

言斯民之

生其性本厚而所以澆薄者以誘於習俗而爲物所遷耳然厚者既可遷而薄則薄者豈不可反而厚乎反薄

歸厚特非聲音笑貌之所能爲爾民之於上固不從其
令而從其好大學言其所令反其所好則民不從亦此
意也敬典者敬其君臣父子兄弟夫婦朋友之常道也
在德者得其典常之道而著之於身也蓋知敬典而不
知在德則典與我猶二也惟敬典而在德焉則所敬之
典無非實有諸已實之感人捷於桴鼓所以時乃罔不
變而信升于大猷也如是則君受其
福臣成其美而有令名於永世矣

顧命

顧還視也成王將崩命羣臣立康王史序
其事爲篇謂之顧命者鄭玄云回首曰顧

臨死回顧而發命也今文古文皆有○呂氏曰
成王經三監之變王室幾搖故此正其終始特
詳焉顧命成王所以正其終
康王之誥康王所以正其始

惟四月哉生魄王不懌

始生魄十六日王
有疾故不悅懌

甲子王乃洮

頽水相被冕服憑王几

洮音桃頽音悔○王發大命臨羣臣必齊戒沐浴今疾病危殆

故但洮盥頽面扶相者被以袞冕憑王几以發命

乃同召太保奭芮伯彤伯畢

公衛侯毛公師氏虎臣百尹御事

召直笑反芮如稅反彤音仝○同召六卿

下至御治事者太保芮伯彤伯畢公衛侯毛公六卿也冢宰第一召公領之司徒第二芮伯爲之宗伯第三彤伯爲之司馬第四畢公領之司寇第五衛侯爲之司空第六毛公領之太保畢毛三公兼也芮彤畢衛毛皆國名入爲天子公卿師氏大夫官虎臣虎賁氏百尹百官之長及諸御治事者平時則召六卿使率其屬此則將發顧命自六卿至御事同以王命召也

王曰嗚呼疾大漸惟幾病日臻既

彌留恐不獲誓言嗣茲予審訓命汝

此下成王之顧命也自歎其疾大進

惟危殆病日至既彌甚而留連恐遂死不得誓言以嗣
續我志此我所以詳審發訓命汝統言曰疾甚言曰病

昔君文王武王宣重光奠麗陳教則肄肄不違用克達

殷集大命

武猶文謂之重光猶舜如堯謂之重華也奠定麗依也言文武宣布重明之德定民所依

陳列教條則民習服習而不違天下化之用能達於殷邦而集大命於周也

在後之侗敬迓

天威嗣守文武大訓無敢昏逾

侗音同○侗愚也成王自稱言其敬迎上天威

命而不敢少忽嗣守文武大訓而無敢昏逾天威天命也大訓述天命者也於天言天威於文武言大訓非有也
二
今天降疾殆弗興弗悟爾尚明時朕言用敬保元子

釗弘濟于艱難

釗音昭○釗康王名成王言今天降疾我身殆將必死弗興弗悟爾庶幾明是

我言用敬保元子釗大濟于

柔遠能邇安勸小大庶邦

懷來馴擾安寧勸導賢君道所當盡者合遠邇小大而言又以見君德所施公平周溥而不可有所偏滯也

思夫人自亂于威儀爾無以釗冒貢于非幾

亂治也威者有威可

畏儀者有儀可象舉一身之則而言也蓋人受天地之中以生是以有動作威儀之則成王思夫人之所以爲人者自治於威儀耳自治云者正其身而不假於外求也貢進也成王又言羣臣其無以元子而冒進於不善之幾也蓋幾者動之微而善惡之所由分也非幾則發於不善而陷於惡矣威儀舉其著於外者而勉之也非幾舉其發於中者而戒之也威儀之治皆本於一念一慮之微可不謹乎孔子所謂知幾子思所謂謹獨周子所謂幾善惡者皆致意於是也成王垂絕之言而拳拳及此其有得於周公者亦深矣○蘇氏曰死生之際聖

賢之所甚重也成王將崩之一日被冕服以見百官出經遠保世之言其不死於燕安婦人之手也明矣其致

刑措

茲既受命還出綴衣于庭越翼日乙丑王崩

還音旋○

綴衣幄帳也羣臣既退徹出幄帳於庭喪大記云疾病君微懸東首於北牖下是也於其明日王崩

太保

命仲桓南宮毛俾爰齊侯呂伋以二千戈虎賁百人逆

子釗於南門之外延入翼室恤宅宗

桓毛二臣名伋太公望子爲天子虎

賁氏延引也翼室路寢旁左右翼室也太保以冢宰攝政命桓毛二臣使齊侯呂伋以二千戈虎賁百人逆太

子釗於路寢門外引入路寢翼室爲憂居宗主也呂氏曰發命者冢宰傳命者兩朝臣承命者勲戚顯諸侯體

統尊嚴樞機周密防危慮患之意深矣入自端門萬姓咸覩與天下共之也延入翼室爲憂居之宗示天下不

可一日無統也唐穆敬文武以降闍寺執國命易主於
宮掖而外廷猶不聞然後知周家之制曲盡備豫雖一
條一節亦不可廢也
丁卯命作冊度
命史爲用書法度
越七日癸

酉伯相命士須材

伯相召公也召公以西伯爲相須取也命士取材木以供喪用

狄設

黼展綴衣

展隱豈反○狄下士祭統云狄者樂吏之賤者也喪大記狄人設階蓋供喪役而典設張

之事者也黼展屏風畫爲斧文者設黼展幄帳如成王生存之日也

牖間南嚮敷重篋席

黼純華玉仍几

篋莫結反○此平時見羣臣覲諸侯之坐也敷設重席所謂天子之席三重者

也篋席桃竹枝席也黼白黑雜繒純緣也華彩色也華王以飾几仍因也因生時所設也周禮吉事變几凶事

仍几是也

西序東嚮敷重底席綴純文貝仍几

此旦夕聽事之坐也東西

廟謂之序底席蒲席也綴雜彩文貝有文之貝以飾几也東序西嚮敷重豐席畫純

雕玉仍几

此養國老饗羣臣之坐也豐席筍席也畫彩色雕刻鏤也

西夾南嚮敷重

筍席玄紛純漆仍几

此親屬私燕之坐也西廂夾室之前筍席竹席也紛雜也以玄黑之

色雜爲之緣漆漆几也牖間兩序西夾其席有四牖戶之間謂之扆天子負扆朝諸侯則牖間南嚮之席坐之正也其三席各隨事以時設也將傳先王顧命知神之在此乎在彼乎故兼設平生之坐也越玉五

重陳寶赤刀大訓弘璧琬琰在西序大玉夷玉天球河

圖在東序盾之舞衣大貝鼗鼓在西房兕之戈和之弓

垂之竹矢在東房

於東西序坐北列玉五重及陳先王所寶器物赤刀赤削也大訓三皇五

帝之書訓誥亦在焉文武之訓亦曰大訓弘璧大璧也
琬琰圭名夷常也球鳴球也河圖伏羲時龍馬負圖出
於河一六位北二七位南三八位東四九位西五十居
中者易大傳所謂河出圖是也周國名周國所制舞衣
大貝如車渠鼗鼓長八尺兌和皆古之巧工垂舜時共
工舞衣鼗鼓戈弓矢皆制作精巧中法度故歷代傳
寶之孔氏曰弘璧琬琰大玉夷玉天球玉之五重也呂
氏曰西序所陳不惟赤刀弘璧而大訓參之東序所陳
不惟大玉夷玉而河圖參之則其所寶者斷可識矣愚
謂寶玉器物之陳非徒以爲國容觀美意者成王平日
之所觀閱手澤在焉陳之以象其生存也楊氏中庸傳
曰宗器於祭陳之示能守也於顧命陳之示能傳也

大輅在賓階面綴輅在阼階面先輅在左塾之前次輅

在右塾之前

大輅玉輅也綴輅金輅也先輅木輅也次輅象輅革輅也王之五輅玉輅以祀不以

封爲最貴金輅以封同姓爲次之象輅以封異姓爲又次之革輅以封四衛爲又次之木輅以封蕃國爲最賤其行也貴者宜自近賤者宜遠也王乘玉輅綴之者金輅也故金輅謂之綴輅最遠者木輅也故木輅謂之先昨階東階也面南嚮也塾門側堂也五輅陳列以象成王之生存也周禮典輅云若有大祭祀則出輅大喪大賓客亦如之是大喪出輅爲常禮也又按所陳寶玉器物皆以西爲上者成王殯在西序故也

二人雀弁執惠立于畢門之內四

人綦弁執戈上刃夾兩階祀一人冕執劉立于東堂一人冕執鉞立于西堂一人冕執戣立于東垂一人冕執瞿立于西垂一人冕執銳立于側階

○祀鉏里反戣音達
○弁士服雀弁赤

色弁也綦弁以文鹿子皮爲之惠三隅矛路寢門一名畢門上刃刃外嚮也堂廉曰祀冕大夫服劉鉞屬戟瞿皆戟屬銳當作鉦說文曰鉦侍臣所執兵從金允聲周書曰一人冕執鉦讀若允東西堂路寢東西廂之前堂也東西垂路寢東西序之階上也側階北陛之階上也○呂氏曰古者執戈戟以宿衛王宮皆士大夫之職無事而奉燕私則從容養德而有膏澤之潤有事而司禦侮則堅明守義而無腹心之虞下及秦漢陞楯執戟尚餘一二此制既廢人主接士大夫者僅有視朝數刻而周廬陞楯或環以椎埋器悍之徒有志於復古者當深

也釋
王麻冕黼裳由賓階齊卿士邦君麻冕蟻裳入即位

齊蔑西反○麻冕三十升麻爲冕也齊升也康王吉服自西階升堂以受先王之命故由賓階也蟻玄色公卿大夫及諸侯皆同服亦廟中之禮不言升階者從王賓階也入即位者各就其位也○呂氏曰麻冕黼裳王祭

服也卿士邦君祭服之裳皆纁今蟻裳者蓋無事於奠
祝不欲純用吉服有位於班列不可純用凶服酌吉凶
之間示禮
之變也
太保太史太宗皆麻冕彤裳太保承介圭上

宗奉同瑁由阼階濟太史秉書由賓階濟御王冊命

宗太

宗伯也彤纁也太保受遺太史奉冊太宗相禮故皆祭
服也介大也大圭天子之守長尺有二寸同爵名祭以
酌酒者瑁方四寸邪刻之以冒諸侯之珪璧以齊瑞信
也太保宗伯以先王之命奉符寶以傳嗣君有主道焉
故升自阼階太史以冊命御王故持書由賓
階以升蘇氏曰凡王所臨所服用皆曰御
曰皇后憑

玉几道揚末命命汝嗣訓臨君周邦率循大卞變和天

下用答揚文武之光訓

成王顧命之言書之冊矣此太
史口陳者也皇太后君也言大

君成王力疾親憑玉几道揚臨終之命命汝嗣守文武
大訓曰汝者父前子名之義卞法也臨君周邦位之大
也率循大卞法之大也變和天下和之大也居大
位由大法致大和然後可以對揚文武之光訓也王再

拜興答曰眇眇予末小子其能而亂四方以敬忌天威

眇小而如亂治也王拜受顧命起答太史曰眇眇然予
微末小子其能如祖父治四方以敬忌天威乎謙辭退
託於不能也顧命有敬迓天威嗣守文武大訓
之語故太史所告康王所答皆於是致意焉乃受同

瑁王三宿三祭三咤上宗曰饗

咤陟嫁反○王受瑁爲
主受同以祭宿進爵也

祭祭酒也咤奠爵也禮成於三故三宿三祭三咤葛氏
曰受上宗同瑁則受太保介圭可知宗伯曰饗者傳神

命以饗
告也

太保受同降盥以異同秉璋以酢授宗人同拜

王答拜

酢疾各反○太保受王所吃之同而下堂盥洗更用他同秉璋以酢酢報祭也祭禮君執圭瓚

裸尸太宗執璋瓚亞裸報祭亦亞裸之類故亦秉璋也以同授宗人而拜尸王答拜者代尸拜也宗人小宗伯

之屬相太保酢者也太保供王故宗人供太保

太保受同祭齊宅授宗人同拜

王答拜

齊才詣反○以酒至齒曰齊太保復受同以祭飲福至齒宅居也太保退居其所以同授宗人

又拜王復答拜太保飲福至齒者方在喪疾歆神之賜而不甘其味也若王則喪之主非徒不甘其味雖飲福亦

廢也 太保降收諸侯出廟門俟

太保下堂有司收撤器用廟門路寢之門也成王之

殯在焉故曰廟言諸侯則卿士以下可知俟者俟見新君也

康王之誥

今文古文皆有但今文合于顧命

王出在應門之內太保率西方諸侯入應門左畢公率

東方諸侯入應門右皆布乘黃朱賓稱奉圭兼幣曰一

二臣衛敢執壤奠皆再拜稽首王義嗣德答拜

漢孔氏曰王出

畢門立應門內鄭氏曰周禮五門一曰皋門二曰雉門
三曰庫門四曰應門五曰路門路門一曰畢門外朝在
路門外則應門之內蓋內朝所在也周中分天下諸侯
主以二伯自陝以東周公主之自陝以西召公主之召
公率西方諸侯蓋西伯舊職畢公率東方諸侯則繼周
公爲東伯矣諸侯入應門列于左右布陳也乘四馬也
諸侯皆陳四黃馬而朱其鬣以爲廷實或曰黃朱若篚
厥玄黃之類賓諸侯也稱舉也諸侯舉所奉圭兼幣曰
一二臣衛一二見非一也爲王蕃衛故曰臣衛敢執壤
地所出奠贊皆再拜首至地以致敬義宜也義嗣德云

者史氏之辭也康王宜嗣前人之德故答拜也吳氏曰穆公使人弔公子重耳重耳稽顙而不拜穆公曰仁夫公子稽顙而不拜則未爲後也蓋爲後者拜不拜故未爲後也弔者舍者礙者升堂致命主孤拜稽顙成爲後者也康王之見諸侯若以爲不當拜而不拜則疑未爲後也且純乎吉也答拜既正其爲後且知其以喪見也

太保暨芮伯咸進相揖皆再拜稽首曰敬告天子皇

天改大邦殷之命惟周文武誕受美若克恤西土

冢宰及司

徒與羣臣皆進相揖定位又皆再拜稽首陳戒於王曰敬告天子示不敢輕告且尊稱之所以重其聽也曰大邦殷者明有天下不足恃也美若未詳蘇氏曰美美里也文王出美里之囚天命自是始順或曰美若即下文之屈若也美厥或字有訛謬西土文武所興之地言文武所以大受命者以其能恤西土之衆也進告不言

諸侯以外見惟新陟王畢協賞罰戡定厥功用敷遺後人休

今王敬之哉張皇六師無壞我高祖寡命

陟升遐也成王初崩未葬

未諡故曰新陟王畢盡協合也好惡在理不在我故能盡合其賞之所當賞罰之所當罰而克定其功用施及後人之休美今王嗣位其敬勉之哉皇大也張皇六師大戒戎備無廢壞我文武艱難寡得之基命也按召公此言若導王以尚威武者然守成之世多溺宴安而無立志苟不詰爾戎兵奮揚武烈則廢弛怠惰而陵遲之漸見矣成康之時病正在是故周公於立政亦懇懇言之後世墜先王之業忘祖父之讎上下苟安甚至於口不言兵亦異於召公

王若曰庶邦侯甸男衛惟予一人

釗報誥

報誥而不及羣臣者以外見內康王在喪故稱名春秋嗣王在喪亦書名也

昔君文

武丕平富不務咎底至齊信用昭明于天下則亦有熊

羆之士不二心之臣保乂王家用端命于上帝皇天用

訓厥道付畀四方

丕平富者溥博均平薄斂富民言文
武德之廣也不務咎者不務咎惡輕

省刑罰言文武罰之謹也底至者推行而底其至也齊
信者兼盡而極其誠也文武務德不務罰之心推行而
底其至兼盡而極其誠內外充實故光輝發越用昭明
于天下蓋誠之至者不可揜也而又有熊羆武勇之士
不二心忠實之臣戮力同心保乂王室文武用受正命
於天上天用順文武之道而付之以天下之大也康王
言此者求助羣
臣諸侯之意乃命建侯樹屏在我後之人今予一二

伯父尚胥暨顧綏爾先公之臣服于先王雖爾身在外

乃心罔不在王室用奉恤厥若無遺鞠子羞

天子稱同姓諸侯曰

伯父康王言文武所以命建侯邦植立蕃屏者意蓋在我後之人也今我一二伯父庶幾相與顧綏爾祖考所以臣服于我先王之道雖身守國在外乃心當常在王室用奉上之憂勤其順承之毋遺我稚子之恥也

羣

公既皆聽命相揖趨出王釋冕反喪服

始相揖者揖而進也此相揖者

揖而退也蘇氏曰成王崩未葬君臣皆冕服禮斂曰非禮也謂之變禮可乎曰不可禮變於不得已嫂非溺終不援也三年之喪既成服釋之而即吉無時而可者曰成王顧命不可以不傳既傳不可以喪服受也曰何爲其不可也孔子曰將冠子未及期日而有齊衰大功之喪則因喪服而冠冠吉禮也猶可以喪服行之受顧命見諸侯獨不可以喪服乎太保使太史奉冊授王于次諸侯入哭於路寢而見王於次王喪服受教戒諫哭踊

答拜聖人復起不易斯言矣春秋傳曰鄭子皮如晉葬
晉平公將以幣行子產曰喪安用幣子皮固請以行既
葬諸侯之大夫欲因見新君叔向辭之曰大夫之事畢
矣而又命孤孤斬焉在衰經之中其以嘉服見則喪禮
未畢其以喪服見是重受弔也大夫將若之何皆無辭
以退今康王既以嘉服見諸侯而又受乘黃玉帛之幣
使周公在必不爲此然則孔子何取此書也曰至矣其
父子君臣之間教戒深切著明足以爲後世法孔子何
爲不取哉然其失
禮則不可不辯

畢命

康王以成周之衆命畢公保釐此其冊命也今文無古文有○唐孔氏曰漢律歷志

云康王畢命豐刑曰惟十有二年六月庚午肅
王命作冊書豐刑此僞作者傳聞舊語得其年
月不得以下之辭妄言作豐刑
耳亦不知豐刑之言何所道也

惟十有二年六月庚午肫越三日壬申王朝步自宗周

至于豐以成周之衆命畢公保釐東郊

康王之十二年也畢公嘗相文

王故康王就豐文王廟命之成周下都也保安釐理也保釐即下文旌別淑慝之謂蓋一代之治體一篇之宗

要也王若曰嗚呼父師惟文王武王敷大德于天下用克

受殷命

畢公代周公爲太師也文王武王布大德于天下用能受殷之命言得之之難也

惟周

公左右先王綏定厥家毖殷頑民遷于洛邑密邇王室

式化厥訓既歷三紀世變風移四方無虞予一人以寧

十二年曰紀父子曰世周公左右文武成王安定國家謹毖頑民遷于洛邑密邇王室用化其教既歷三紀世

已變而風始移今四方無可虞度之事而予一人以寧言化之之難也

道有升降政由俗

革不臧厥臧民罔攸勸

有升有降猶言有隆有污也周公當世道方降之時至君陳畢

公之世則將升於大猷矣爲政者因俗變革故周公誌殷而謹厥始君陳有容而和厥中皆由俗爲政者當今之政旌別淑慝之時也苟不善其善則民無所勸慕矣

惟公懋德克勤小物弼亮

四世正色率下罔不祇師言嘉績多于先王子小子垂

拱仰成

懋盛大之義予懋乃德之懋小物猶言細行也言畢公既有盛德又能勤於細行輔導四世風

采凝峻表儀朝著若大若小罔不祇服師訓休嘉之績蓋多於先王之時矣今我小子復何爲哉垂衣拱手以仰其成而已康王將付畢公以保釐之寄故敘其德業之盛而歸美之也

王曰嗚呼父師今

子祗命公以周公之事往哉

今我敬命公以周公化訓頑民之事公其往哉言非

周公所爲不敢屈公以行也

旌別淑慝表厥宅里彰善癉惡樹之風

聲弗率訓典殊厥井疆俾克畏慕申畫郊圻慎固封守

以康四海

癉多早反守舒究反○淑善慝惡癉病也旌善別惡成周今日由俗革之政也表異善人

之居里如後世旌表門閭之類顯其爲善者而病其爲不善者以樹立爲善者風聲使顯於當時而傳於後世所謂旌淑也其不率訓典者則殊異其井里疆界使不得與善者雜處禮記曰不變移之郊不變移之遂即其法也使能畏爲惡之禍而慕爲善之福所謂別慝也圻與畿同郊圻之制昔固規畫矣曰申云者申明之也封域之險昔固有守矣曰謹云者戒嚴之也疆域障塞歲久則易湮世平則易玩時緝而屢省之乃所以尊嚴王

魯王幾安則四海安矣

政貴有恒辭尚體要不惟好異商俗靡靡

利口惟賢餘風未殄公其念哉

恒胡登反○對暫之謂恒對常之謂異趣完具

而已之謂體衆體所會之謂要政事統一辭令簡實深戒作聰明趨浮末好異之事凡論治體者皆然而在商俗則尤爲對病之藥也蘇氏曰張釋之諫漢文帝秦任刀筆之吏爭以亟疾苛察相高其弊徒文具無惻隱之實以故不聞其過陵夷至於二世天下土崩今以嗇夫口辯而超遷之臣恐天下隨風靡爭口辯無其實凡釋之所論則康王我聞曰世祿之家鮮克由禮以蕩陵德以告畢公者也

實悖天道敝化奢麗萬世同流

鮮上聲悖蒲沒反○古人論世祿之家逸樂泰

養其能由禮者鮮矣既不由禮則心無所制肆其驕蕩陵蔑有德悖亂天道敝壞風化奢侈美麗萬世同一流

也康王將言殷士怙侈滅義之
惡故先取古人論世族者發之

茲殷庶士席寵惟舊怙

侈滅義服美于人驕淫矜侈將由惡終雖收放心閑之

惟艱

傳枯瓜反○呂氏曰殷士憑藉光寵助發其私欲
者有自來矣私欲公義相爲消長故怙侈必至滅

義義滅則無復羞惡之端徒以服飾之美侈之於人而
身之不美則莫之恥也流而不反驕淫矜侈百邪並見
將以惡終矣洛邑之遷式化厥訓雖已收
其放心而其所以防閑其邪者猶甚難也

資富能訓惟

以永年惟德惟義時乃大訓不由古訓于何其訓

言殷士不

可不訓之也資資財也資富而能訓則心不遷於外物
而可全其性命之正也然訓非外立教條也惟德惟義
而已德者心之理義者理之宜也德義人所同有也惟
德義以爲訓是乃天下之大訓然訓非可以已私言也

當稽古以爲之說蓋善無微則民不從不由古以爲訓于何以爲訓乎

王曰嗚呼父師邦

之安危惟茲殷士不剛不柔厥德允修

是時四方無虞矣最爾殷民化

訓三紀之餘亦何足慮而康王拳拳以邦之安危惟繫於此其不苟於小成者如此文武周公之澤其深長也宜哉不剛所以保之不柔所以釐之不剛不柔其德信乎其修矣惟周公克慎厥始惟

君陳克和厥中惟公克成厥終三后協心同底于道道洽政治澤潤生民四夷左社罔不咸賴予小子永膺多

福

殊厥厥井疆非治之成也使商民皆善然後可謂之成此曰成者預期之也三后所治者洛邑而施及四夷

王畿四方之本也吳氏曰道者致治之道也始之中之終之雖時有先後皆能即其行事觀其用心而有以濟

之若出於一時若成於一人謂之協心如此

公其惟時成周建無窮之基亦

有無窮之聞子孫訓其成式惟又

聞音問○建立訓順式法也成周指下都

而言呂氏曰畢公四世元老豈區區立後世名者而勉德之隆亦豈少此康王所以望之者蓋相期以無窮事業乃尊敬之至也 嗚呼罔曰弗克惟既厥心罔曰民寡惟慎厥

事欽若先王成烈以休于前政

蘇氏曰曰弗克者畏其難而不敢爲者也曰民

寡者易其事以爲不足爲者也前政周公君陳也

君牙

君牙臣名穆王命君牙爲大司徒此其誥命也今文無古文有

王若曰嗚呼君牙惟乃祖乃父世篤忠貞服勞王家厥

有成績紀于太常

王穆王也康王孫昭王子周禮司勳云凡有功者銘書于王之太常司常

云日月爲常畫日月於旌旗也

惟予小子嗣守文武成康遺緒亦惟先

王之臣克左右亂四方心之憂危若蹈虎尾涉于春冰

緒統緒也若蹈虎尾畏其噬若涉春冰畏其陷言憂危之至以見求助之切也

今命爾予翼作

股肱心膂續乃舊服無忝祖考

膂脊也舊服忠貞服勞之事忝辱也欲君牙以

其祖考事先王者而事我也

弘敷五典式和民則爾身克正罔敢弗

正民心罔中惟爾之中

弘敷者大而布之也式和者敬而和之也則有物有則之則君

臣之義父子之仁夫婦之別長幼之序朋友之信是也典以設教言故曰弘敷則以民彝言故曰式和此司徒

之教也然教之本則在君牙之身正也中也民則之體而人之所同然也正以身言欲其所處無邪行也中心言欲其所存無邪思也孔子曰子率以正孰敢不正周公曰率自中此告君牙以司徒之職也

夏暑

雨小民惟曰怨咨冬祁寒小民亦惟曰怨咨厥惟艱哉

思其艱以圖其易民乃寧

祁大也暑雨祁寒小民怨咨自傷其生之艱難也厥惟艱

哉者歎小民之誠爲艱難也思念其難以圖其易民乃安也艱者饑寒之艱易者衣食之易司徒敷五典擾兆民兼教養之職此又告君牙以養民之難也

嗚呼丕顯哉文王謨丕承哉武

王烈啓佑我後人咸以正罔缺爾惟敬明乃訓用奉若

于先王對揚文武之光命追配于前人

丕大謨謀烈功也文顯於前武

承於後曰謨曰烈各指其實而言之咸以正者無一事不出於正咸罔缺者無一事不致其周密若順對答配匹也前人王若曰君牙乃惟由先正舊典時式民之治君牙祖父

亂在茲率乃祖考之攸行昭乃辟之有义

先正君牙祖父也君牙由

祖父舊職而是法之民之治亂在此而已法則治否則亂也循汝祖父之所行而顯其君之有义復申戒其守家法以終之按此篇專以君牙祖父爲言曰纘舊服曰由舊典曰無忝曰追配曰由先正舊典曰率祖考攸行然則君牙之祖父當任司徒之職而其賢可知矣惜載籍之無傳也陳氏曰康王時芮伯爲司徒君牙豈其後邪

罔命

罔俱永反○穆王命伯罔爲太僕正此其詰命也今文無古文有○呂氏曰陪僕誓

御之臣後世視爲賤品而不之擇者曾不知人
主朝夕與居氣體移養常必由之潛消默奪於
冥冥之中而明爭顯諫於昭昭之際抑末矣自
周公作立政而數綴衣虎賁知恤者鮮則君德
之所繫前此知之者亦罕矣周公表而出之其
選始重穆王之用太僕正特作命書至與大司
徒略等其知本哉

王若曰伯冏惟予弗克于德嗣先人宅丕后怵惕厲

中夜以興思免厥愆

怵勅律反○伯冏臣名穆王言我不能于德繼前人居大君之位恐

懼危厲中夜以興思所以免其咎過

昔在文武聰明齊聖小大之臣咸懷

忠良其侍御僕從罔匪正人以旦夕承弼厥辟出入起

居罔有不欽發號施令罔有不臧下民祇若萬邦咸休

從才用反○侍給侍左右者御車御之官僕從太僕羣僕凡從王者承承順之謂弼正救之謂雖文武之君聰明齊聖小大之臣咸懷忠良固無待於侍御僕從之承弼者然其左右奔走皆得正人則承順正救亦豈小補

哉惟予一人無良實賴左右前後有位之士匡其不及

繩愆糾謬格其非心俾克紹先烈

無良言其質之不善也匡輔助也繩直糾

正也非心非僻之心也先烈文武也

今予命汝作大正正于羣僕侍御之

臣懋乃后德交修不逮

大正太僕正也周禮太僕下大夫也羣僕謂祭僕隸僕戎僕齊

僕之類穆王欲伯罔正其羣僕侍御之臣以勉進君德而交修其所不及或曰周禮下大夫不得爲正漢孔氏

以爲大御中大夫蓋周禮大御最長下又有羣僕與此所謂正于羣僕者合且與君同車最爲親近也

慎

簡乃僚無以巧言令色便辟側媚其惟吉士

便辟連反
辟匹亦反

○巧好令善也好其言善其色外飾而無質實者也便者順人之所欲辟者避人之所惡側者姦邪媚者諛說小人也吉士君子也言當謹擇汝之僚佐無任小人而惟用君子也又按此言謹簡乃僚則成周之時凡爲官長者皆得自舉其屬不特辟除府史胥徒而已僕臣正厥后克正僕臣諛厥后

自聖后德惟臣不德惟臣

自聖自以爲聖也僕臣之賢否係君德之輕重如此呂氏

曰自古小人之敗君德爲昏爲虐爲侈爲縱曷其有極至於自聖猶若淺之爲害穆王獨以是蔽之者蓋小人之盡其君必使之虛美熏心傲然自聖則謂人莫已若而欲予言莫之違然後法家拂士日遠而快意肆情之

事亦莫或黜其間自聖之證既見而百疾從之昏虐侈縱皆其枝葉而不足論也爾無昵于儉

人充耳目之官迪上以非先王之典

汝無比近小人充我耳目之官導君

上以非先王之典蓋穆王自量其執德未固恐左右以異端進而蕩其心也

非人其吉惟貨

其吉若時瘝厥官惟爾大弗克祗厥辟惟予汝辜

戒其以貨

賄任羣僕也言不于其人之善而惟以貨賄爲善則是曠厥官汝大不能敬其君而我亦汝罪矣

王曰

嗚呼欽哉永弼乃后于彝憲

彝憲常法也呂氏曰穆王卒章之命望於伯冏者深

且長矣此心不繼造父爲御周遊天下將必有車轍馬跡導其侈者果出於僕御之間抑不知伯冏猶在職乎否也穆王豫知所戒憂思深長猶不免躬自蹈之人心操捨之無常可懼哉

呂刑

呂侯爲天子司寇穆王命訓刑以詰四方史錄爲篇今文古文皆有○按此篇專訓

贖刑蓋本舜典金作贖刑之語今詳此書實則不然蓋舜典所謂贖者官府學校之刑爾若五刑則固未嘗贖也五刑之寬惟處以流鞭扑之寬方許其贖今穆王贖法雖大辟亦與其贖免矣漢張敞以討羗兵食不繼建爲入穀贖罪之法初亦未嘗及夫殺人及盜之罪而蕭望之等猶以爲如此則富者得生貧者獨死恐開利路以傷治化曾謂唐虞之世而有是贖法哉穆王巡遊無度財匱民勞至其末年無以爲計乃爲此一切權宜之術以斂民財夫子錄之蓋亦示戒然其一篇之書哀矜惻怛猶可以想見三代忠厚之遺意云爾又按書傳引此多稱甫刑史記作甫侯言於王作修刑辟呂後爲甫歟

惟呂命王享國百年耄荒度作刑以詰四方

惟呂命與惟說命語

意同先此以見訓刑爲呂侯之言也耄老而昏亂之稱荒忽也孟子曰從獸無厭謂之荒穆王享國百年車轍馬跡遍于天下故史氏以耄荒二字發之亦以見贖刑爲穆王耄荒所訓耳蘇氏曰荒大也大度作刑猶禹曰予荒度土功荒當屬下句亦通然耄亦貶之之辭也王曰若古有訓蚩尤惟始作

亂延及于平民罔不寇賊鴟義姦宄奪攘矯虔

蚩尤之反鴟處

脂反○言鴻荒之世渾厚敦龐蚩尤始開暴亂之端駢扇熏炙延及平民無不爲寇爲賊鴟義者以鴟張跋扈爲義矯虔者矯詐虔劉也苗民弗用靈制以刑惟作五虐之刑曰法

殺戮無辜爰始淫爲劓則極黥越茲麗刑并制罔差有

辭

剗牛例反則而志反極竹角反黥渠京反○苗民承蚩尤之暴不用善而制以刑惟作五虐之刑名之曰

法以殺戮無罪於是始過爲剗鼻則耳極竅黥面之法於麗法者必刑之并制無罪不復以曲直之辭爲差別

皆刑之也

民興胥漸泯泯焚焚罔中于信以覆詛盟虐威庶

戮方告無辜于上帝監民罔有馨香德刑發聞惟腥

焚數文反又音紛○渚渚昏也焚焚亂也民相漸染爲昏爲亂無復誠信相與反覆詛盟而已虐政作威衆被戮者方各告無罪於天天視苗民無有馨香德而刑戮發聞莫非腥穢呂氏曰形於聲嗟窮之反也動於氣臭惡之熱也馨香陽也腥穢陰也故德爲馨香而刑發腥穢也

皇帝哀矜庶戮之不辜

報虐以威遏絕苗民無世在下

皇帝舜也以書考之治苗民命伯夷禹稷皋陶

皆舜之事報苗之虐以我之威絕滅也謂
竄與分北之類過絕之使無繼世在下國乃命重黎絕

地天通罔有降格羣后之逮在下明明棐常鰥寡無蓋

重少昊之後黎高陽之後重即羲黎即和也呂氏曰治
世公道昭明爲善得福爲惡得禍民曉然知其所由則
不求之眇茫冥昧之間當三苗昏虐民之得罪者莫知
其端無所控訴相與聽於神祭非其鬼天地人神之典
雜揉瀆亂此妖誕之所以興人心之所以不正也在舜
當務之急莫先於正人心首命重黎修明祀典天子然
後祭天地諸侯然後祭山川高卑上下各有分限絕地
天之通嚴幽明之分君蒿妖誕之說舉皆屏息羣后及
在下之羣臣皆精白一心輔助常道民卒善而得福惡
而得禍雖鰥寡之微亦無有蓋蔽而不得自伸者也○
按國語曰少皞氏之衰九黎亂德民神雜揉家爲巫史
民瀆齊盟禍災荐臻顛頊受之乃命南正重司天以屬

神北正黎司地以屬民使無相侵瀆其後三苗復九黎之德堯復育重黎之後不忘舊者使復興之皇帝

清問下民鰥寡有辭于苗德威惟畏德明惟明

清問虛心而問

也有辭聲苗之過也苗以虐爲威以察爲明帝反其道以德威而天下無不畏以德明而天下無不明也乃

命三后恤功于民伯夷降典折民惟刑禹平水土主名

山川稷降播種農殖嘉穀三后成功惟殷于民

恤功致憂民之

功也典禮也伯夷降天地人之三禮以折民之邪妄蘇氏曰失禮則入刑禮刑一物也伯夷降典以正民心禹平水土以定民居稷降播種以厚民生三后成功而致民之殷盛富庶也吳氏曰二典不載有兩刑官蓋傳聞之謬也愚按臯陶未爲刑官之時豈伯夷實兼之歟下文又言伯夷播刑之迪不應如此謬誤士制百

姓于刑之中以教祇德

命臯陶爲士制百姓于刑辟之中所以檢其心而教以祇德也

○吳氏曰臯陶不與三后之列遂使後世以刑官爲輕後漢楊賜拜廷尉自以代非法家言曰三后成功惟殷于民臯陶不與蓋吝之也是後世非獨人臣以刑官爲輕人君亦以爲輕矣觀舜之稱臯陶曰刑期于無刑民惕于中時乃功又曰俾予從欲以治四方風動惟乃之休其所繫乃如此是可輕哉呂氏曰呂刑一篇以刑爲主故歷敘本末而歸之於臯陶之刑勢不得與伯夷禹稷雜稱言固有賓主也穆穆在上明明

在下灼于四方罔不惟德之勤故乃明于刑之中率乂

于民棐彝

穆穆者和敬之容也明明者精白之容也灼于四方者穆穆明明輝光發越而四達也君

臣之德昭明如是故民皆觀感動盪爲善而不能自己也如是而猶有未化者故士師明于刑之中使無過不

及之差率又于民輔其常性所謂刑罰之精華也

典獄非訖于威惟訖于富敬

忌罔有擇言在身惟克天德自作元命配享在下

訖盡也威

權勢也富賄賂也當時典獄之官非惟得盡法於權勢之家亦惟得盡法於賄賂之人言不爲威屈不爲利誘也敬忌之至無有擇言在身大公至正純乎天德無毫髮不可舉以示人者天德在我則大命自我作而配享在下矣在下者對天之辭蓋推典獄用刑之極功而至於與天爲一者如此

王曰嗟四方司

政典獄非爾惟作天牧今爾何監非時伯夷播刑之迪其今爾何懲惟時苗民匪察于獄之麗罔擇吉人觀于五刑之中惟時庶威奪貨斷制五刑以亂無辜上帝不

蠲降咎于苗苗民無辭于罰乃絕厥世

司政典獄漢孔氏曰諸侯也爲

諸侯主刑獄而言非爾諸侯爲天牧養斯民乎爲天牧民則今爾何所監懲所當監者非伯夷乎所當懲者非有苗乎伯夷布刑以啓迪斯民捨臯陶而言伯夷者探本之論也麗附也苗民不察於獄辭之所麗又不擇吉人俾觀于五刑之中惟是責者以威亂政富者以貨奪法斷制五刑亂虐無罪上帝不蠲貸而降罰于苗苗民無所辭其罰而遂殄滅之也王曰嗚呼念之哉伯父伯兄仲叔季弟

幼子童孫皆聽朕言庶有格命今爾罔不由慰日勤爾罔或戒不勤天齊于民俾我一日非終惟終在人爾尚敬逆天命以奉我一人雖畏勿畏雖休勿休惟敬五刑

以成三德一人有慶兆民賴之其寧惟永

此告同姓諸侯也格至也

參錯訊鞠極天下之勞者莫若獄苟有毫髮怠心則民有不得其死者矣罔不由慰日勤者爾所用以自慰者無不以日勤故職舉而刑當也爾罔或戒不勤者刑罰之用一成而不可變者也苟頃刻之不勤則刑罰失中雖深戒之而已施者亦無及矣戒固善心也而用刑豈可以或戒也哉且刑獄非所恃以爲治也天以是整齊亂民使我爲一日之用而已非終即康誥大罪非終之謂言過之當宥者惟終即康誥小罪惟終之謂言故之當辟者非終惟終皆非我得輕重惟在夫人所犯耳爾當敬逆天命以承我一人畏威古通用威辟之也休宥之也我雖以爲辟爾惟勿辟我雖以爲宥爾惟勿宥惟敬乎五刑之用以成剛柔正直之德則君慶於上民賴於下而安寧之福其永久而不替矣

王曰吁來有邦有土告爾祥刑在今

爾安百姓何擇非人何敬非刑何度非及

有民社者皆在所告也夫

刑凶器也而謂之祥者刑期無刑民協于中其祥莫大焉及逮也漢世詔獄所逮有至數萬人者審度其所當逮者而後可逮之也曰何曰非問答以發其意以明三者之決不可不盡心也

兩造具備師聽

五辭五辭簡孚正于五刑五刑不簡正于五罰五罰不

服正于五過

兩造者兩爭者皆至也周官以兩造聽民訟具備者詞證皆在也師衆也五辭麗於

五刑之辭也簡核其實也孚無可疑也正質也五辭簡核而可信乃質于五刑也不簡者辭與刑參差不應刑之疑者也罰贖也疑于刑則質于罰也不服者辭與罰又不應也罰之疑者也過誤也疑于罰則質于過而宥免之也

五過之疵惟官惟反惟內惟貨惟來其罪惟均其

審克之

疵病也官威勢也反報德怨也內女謁也貨賄賂也來干請也惟此五者之病以出入人罪則

以人之所犯坐之也審克者察之詳而盡其能也下文屢言以見其丁寧忠厚之至疵於刑罰亦然但言於五過者舉輕五刑之疑有赦五罰之疑有赦其審克之簡

以見重也

孚有衆惟貌有稽無簡不聽具嚴天威

刑疑有赦正于五罰也罰疑有

赦正于五過也簡核情實可信者衆亦惟考察其容貌周禮所謂色聽是也然聽獄以簡核爲本苟無情實在所不聽上帝臨汝不墨辟疑赦其罰百鍰閱實其罪劓

最有毫髮之不盡也

辟疑赦其罰惟倍閱實其罪剕辟疑赦其罰倍差閱實

其罪宮辟疑赦其罰六百鍰閱實其罪大辟疑赦其罰

千鍰閱實其罪墨罰之屬千劓罰之屬千剕罰之屬五

百宮罰之屬三百大辟之罰其屬二百五刑之屬三千

上下比罪無僭亂辭勿用不行惟察惟法其審克之

鍰

關反○墨刻額而涅之也劓割鼻也剕刖足也宮淫刑也男子割勢婦人幽閉大辟死刑也六兩曰鍰閱視也倍二百鍰也倍差倍而又差五百鍰也屬類也三千總計之也周禮司刑所掌五刑之屬二千五百刑雖增舊然輕罪比舊爲多而重罪比舊爲減也比附也罪無正律則以上下刑而比附其罪也無僭亂辭勿用不行未詳或曰亂辭辭之不可聽者不行舊有是法而今不行者戒其無差誤於僭亂之辭勿用今所不行之法惟詳明法意而審克之也○今按臯陶所謂罪疑惟輕者降一等而罪之耳今五刑疑赦而直罰之以金是大辟宮

荆劓墨皆不復降等用矣蘇氏謂五刑疑各入罰不降
當因古制非也舜之贖刑官府學校鞭扑之刑耳夫刑
莫輕於鞭扑入於鞭扑之刑而又情法猶有可議者則
是無法以治之故使之贖特不欲遽釋之也而穆王之
所謂贖雖大辟亦贖也舜
豈有是制哉詳見篇題 上刑適輕下服下刑適重上

服輕重諸罰有權刑罰世輕世重惟齊非齊有倫有要

事在上刑而情適輕則服下刑舜之宥過無大康誥所
謂大罪非終者是也事在下刑而情適重則服上刑舜
之刑故無小康誥所謂小罪非眚者是也若諸罰之輕
重亦皆有權焉權者進退推移以求其輕重之宜也刑
罰世輕世重者周官刑新國用輕典刑亂國用重典刑
平國用中典隨世而爲輕重者也輕重諸罰有權者權
一人之輕重也刑罰世輕世重者權一世之輕重也惟
齊非齊者法之權也有倫有要者法之經也言刑罰雖

惟權變是適而齊之以不齊焉至其倫要所在

蓋有截然而不可紊者矣此兩句總結上意 罰懲非

死人極于病非佞折獄惟良折獄罔非在中察辭于差
非從惟從哀敬折獄明啓刑書胥占咸庶中正其刑其

罰其審克之獄成而字輸而字其刑上備有并兩刑

以罰

懲過雖非致人於死然民重出贖亦甚病矣佞口才也
非口才辯給之人可以折獄惟溫良長者視民如傷者
能折獄而無不在中也此言聽獄者當擇其人也察辭
于差者辭非情實終必有差聽獄之要必於其差而察
之非從惟從者察辭不可偏主猶曰不然而然所以審
輕重而取中也哀敬折獄者惻怛敬畏以求其情也明
啓刑書胥占者言詳明法律而與衆占度也咸庶中正
者皆庶幾其無過忒也於是刑之罰之又當審克之也

此言聽獄者當盡其心也若是則獄成於下而民信之
獄輸於上而君信之其刑上備有并兩刑者言上其斷
獄之書當備情節一人而犯兩事罪雖從重亦
并兩刑而上之也此言讞獄者當備其辭也

王曰鳴

呼敬之哉官伯族姓朕言多懼朕敬于刑有德惟刑今
天相民作配在下明清于單辭民之亂罔不中聽獄之
兩辭無或私家于獄之兩辭獄貨非寶惟府辜功報以
庶尤永畏惟罰非天不中惟人在命天罰不極庶民罔
有令政在于天下

此總告之也官典獄之官也伯諸侯也族同族姓異姓也朕之於刑言且

多懼況用之乎朕敬于刑者畏之至也有德惟刑厚之至也今天以刑相治斯民汝實任責作配在下可也明

清以下敬刑之事也獄辭有單有兩單辭者無證之辭也聽之爲尤難明者無一毫之蔽清者無一點之汚曰明曰清誠敬篤至表裏洞徹無少私曲然後能察其情也亂治也獄貨鬻獄而得貨也府聚也辜功猶云罪狀也報以庶尤者降之百殃也非天不中惟人在命者非天不以中道待人惟人自取其殃禍之命爾此章文有未詳者姑缺之

王曰嗚呼嗣孫今往何監非德于民之中尚明聽之哉哲人惟刑無疆之辭屬于五極咸中有慶受王

嘉師監于茲祥刑

此詒來世也嗣孫嗣世子孫也言今往何所監視非用刑成德而能全民

所受之中者乎下文哲人即所當監者五極五刑也明哲之人用刑而有無窮之譽蓋由五刑咸得其中所以有慶也嘉善師衆也諸侯受天子良民善衆當監視于此祥刑申言以結之也

文侯之命

幽王爲犬戎所殺晉文侯與鄭武公迎太子宜臼立之是爲平王遷於東

都平王以文侯爲方伯賜以秬鬯弓矢作策書命之史錄爲篇今文古文皆有

王若曰父義和丕顯文武克慎明德昭升于上敷聞在下惟時上帝集厥命于文王亦惟先正克左右昭事厥

辟越小大謀猷罔不率從肆先祖懷在位

同姓故稱父文侯名仇義

和其字不名者尊之也丕顯者言其德之所成克謹者言其德之所修昭升敷聞言其德之所至也文武之德如此故上帝集厥命于文王亦惟爾祖父能左右昭事其君於小大謀猷無敢背違故先王得安在位

鳴

呼閔予小子嗣造天丕愆殄資澤于下民侵戎我國家

純卽我御事罔或者壽俊在厥服予則罔克曰惟祖惟

父其伊恤朕躬嗚呼有績予一人永綏在位

歎而自痛傷也閔憐

也嗣造天丕愆者嗣位之初爲天所大譴父死國敗也殄絕純大也絕其資用惠澤于下民本旣先撥故戎狄侵陵爲我國家之害甚大今我御事之臣無有老成俊傑在厥官者而我小子又材劣無能其何以濟難又言諸侯在我祖父之列者其誰能恤我乎又歎息言有能致功予一人則可永安厥位矣蓋悲國之無人無有如上文先正之昭事而先王得安在位也父義和汝克昭乃顯祖汝肇刑文

武用會紹乃辟追孝于前文人汝多修扞我于艱若汝

予嘉

扞侯扞反○顯祖文人皆謂唐叔卽上文先正昭事厥辟者也後罔或者壽俊在厥服則刑文武之

道絕矣。今刑文武自文侯始。故曰：「肇刑文武會者合之，而使不離結者繼之，而使不絕前文人猶云：『前寧人汝多所修完，扞衛我于艱難。』」王曰：「父義和其歸視爾師寧若汝之功，我所嘉美也。」

爾邦用賚爾秬鬯一卣，彤弓一彤矢百，盧弓一盧矢百。

馬四匹，父往哉！柔遠能邇，惠康小民，無荒寧簡恤爾都。

用成爾顯德。

師衆也。黑黍曰秬，釀以鬯草卣中尊也。諸侯受錫命當告其始祖，故賜鬯也。彤，赤盧。

黑也。諸侯有大功，賜弓矢，然後得專征伐。馬，供武用。四匹曰乘。侯伯之賜無常，以功大小爲度也。簡者，簡閱其士，恤者，惠恤其民。都者，國之都鄙也。○蘇氏曰：『予讀文侯篇，知東周之不復興也。宗周傾覆，禍敗極矣。平王宜若衛文公越句踐然，今其書乃旋旋焉，與平康之世無異。』春秋傳曰：『厲王之禍，諸侯釋位以間，王政宣王有志。』

而後効官讀文侯之命知平王之無志也愚按史記幽王娶於申而生太子宜臼後幽王嬖褒姒廢申后去太子申侯怒與繒西夷犬戎攻王而殺之諸侯即申侯而立故太子宜臼是爲平王平王以申侯立已爲有德而忘其弑父爲當誅方將以復讎討賊之衆而爲戍申戍許之舉其忘親背義得罪于天已甚矣何怪其萎靡頹墮而不自振也哉然則是命也孔子以其猶能言文武之舊而存之歟抑亦以示戒於天下後世而存之歟

費誓

費地名淮夷徐戎並起爲寇魯侯征之於費誓衆故以費誓名篇今古文皆有○

呂氏曰伯禽撫封於魯夷戎妄意其未更事且乘其新造之隙而伯禽應之者甚整暇有序先治戎備次之以除道路又次之以嚴部伍又次之以立期會先後之序皆不可紊又按費誓秦誓皆侯國之事而繫於帝王書末者猶詩之錄商頌魯頌也

公曰嗟人無譁聽命徂茲淮夷徐戎並興

漢孔氏曰徐戎淮夷並起

寇魯伯禽爲方伯帥諸侯之師以征歎而救之使無喧譁欲其靜聽誓命蘇氏曰淮夷叛已久矣及伯禽就國

又脅徐戎並起故曰徂茲淮夷善敕乃甲冑敵乃干無徐戎並興徂茲者猶曰往者云

敢不弔備乃弓矢鍛乃戈矛礪乃鋒刃無敢不善

敕速條反

敵舉天反弔音的鍛都玩反○敕縫完也縫完其甲冑勿使斷毀敵鄭氏云猶繫也王肅云敵植當有紛繫持之弔精至也鍛淬礪磨也甲冑所以衛身弓矢戈矛所以克敵先自衛而後攻人亦其序也今惟淫

舍牯牛馬杜乃獲斂乃穿無敢傷牯牯之傷汝則有常

刑牯音谷獲胡化反斂乃結反穿疾郢反○淫大也牯開牧也獲機檻也斂塞也師既出牛馬所舍之開牧

大布於野當室塞其獲穿一或不謹而傷閑牧之牛馬則有常刑此令軍在所之居民也舉此例之凡川梁藪澤險阻屏翳有害於師屯馬牛其風臣妾逋逃無敢越者皆在矣此除道路之事

逐祇復之我商賚汝乃越逐不復汝則有常刑無敢寇

攘踰垣牆竊馬牛誘臣妾汝則有常刑

役人賤者男曰臣女曰妾馬牛

風逸臣妾逋亡不得越軍壘而逐之失主雖不得逐而人得風馬牛逃臣妾者又當敬還之我商度多寡以賞汝如或越逐而失伍不復而攘取皆有常刑有故竊奪踰垣牆竊人牛馬誘人臣妾者亦有常刑此嚴部位之事

甲戌我惟征徐戎峙乃糗糧無敢不逮汝則有大刑

魯人三郊三遂峙乃楨榦甲戌我惟築無敢不供汝則

有無餘刑非殺魯人三郊三遂峙乃芻茭無敢不多汝

則有大刑

峙丈理反糗去九反楨音貞芻臠俞反茭音交○甲戌用兵之期也峙儲備也糗糧食也

不逮若今之乏軍興淮夷徐戎並起今所攻獨徐戎者蓋量敵之堅瑕緩急而攻之也國外曰郊郊外曰遂天子六軍則六鄉六遂大國三軍故魯三郊三遂也楨榦板築之木題曰楨牆端之木也旁曰榦牆兩邊障土者也以是日征是日築者彼方禦我之攻勢不得擾我之築也無餘刑非殺者刑之非一但不至於殺爾芻茭供軍牛馬之用軍以期會芻糧爲急故皆服大刑楨榦芻茭獨言魯人者地近而致使也

秦誓

左傳杞子自鄭使告于秦曰鄭人使我掌其北門之管若潛師以來國可得也穆公

訪諸蹇叔蹇叔曰不可公辭焉使孟明西乞白乙伐鄭晉襄公帥師敗秦師于殽囚其三帥穆

公悔過誓告羣臣史錄
爲篇今文古文皆有

公曰嗟我士聽無譁予誓告汝羣言之首

首之爲言第一義也將舉

古人之言故先發此

古人有言曰民訖自若是多盤責人斯無難

惟受責俾如流是惟艱哉

訖盡盤安也凡人盡自若是多安於徇己其責人無難惟

受責於人俾如流水略無扞格是惟難哉穆公悔前日安於自徇而不聽蹇叔之言深有味乎古人之語故舉爲誓言我心之憂日月逾邁若弗云來

已然之過不可追未遷之善猶

可及憂歲月之逝若無復有來日也

惟古之謀人則曰未就予忌惟今之

謀人姑將以爲親雖則云然尚猷詢茲黃髮則罔所愆

忌疾姑且也古之謀人老成之士也今之謀人新進之士也非不知其爲老成以其不就已而忌疾之非不知其新進姑樂其順便而親信之前日之過雖已云然然尚謀詢茲黃髮之人則庶罔有所愆蓋悔其既往之失而冀其將來之善也

番番良士旅力既愆我尚有之仡仡勇夫射御不違我尚不欲惟截截善謗言俾君子易辭我皇多

有之

番音波論毗俾緬二反○番番老貌仡仡勇貌截截辯給貌論巧也皇遑通旅力既愆之良士前日

所詆墓木既拱者我猶庶幾得而有之射御不違之勇夫前日所誇過門超乘者我庶幾不欲用之勇夫我尚不欲則辯給善巧言能使君子變易其辭說者我遑暇多有之哉良士謂寒叔勇夫謂三帥謗言謂杞子先儒皆謂穆公悔用孟明詳其誓昧昧我思之如有一介臣意蓋深悔用杞子之言也

斷斷猗無他技其心休休焉其如有客人之有技若已
有之人之彥聖其心好之不啻如自其口出是能容之

以保我子孫黎民亦職有利哉

斷都玩反○昧昧而思者深潛而靜思也介獨

也大學作个斷斷誠一之貌猗語辭大學作兮休休易直好善之意容有所受也彥美士也聖通明也技才聖德也心之所好甚於口之所言也職主也人之有技冒疾以惡之人之彥聖

而違之俾不達是不能容以不能保我子孫黎民亦曰

殆哉

冒大學作媚忌也違背違之也達窮達之達殆危也蘇氏曰至哉穆公之論此二人也前一人似房

玄齡後一人似李林甫後之人主監此足矣

邦之杌隍曰由一人邦之榮懷


亦尚一人之慶

机隄不安也懷安也言國之危殆繫於所任一人之非國之榮安繫於所任一

人之是申繳上二章意



書經卷六



覆校官助教臣金學詩

校對官庶吉士臣王坦修

謄錄監生臣潘承煒